

清

史

稿

清史稿

列傳一百一

黃廷桂

鄂彌達

楊廷璋

莊有恭

李侍堯

伍彌泰

黃廷桂字丹崖漢軍鑲紅旗人父秉中官福建巡撫廷桂初襲曾祖憲章拖沙喇哈番世職康熙五十二年授三等侍衛遷參領聖祖辛熱河屢扈從世宗在潛邸知其才雍正三年授直隸宣化總兵五年擢四川提督疏言四川三面環夷軍械多敝缺現飭修補川馬本不高大又日繫槽多羸斃令在豐樂場後荒山督牧士卒驕奢飭服用毋僭官制歲十月番入內地傭工名曰下場次年夏初始歸以禁攜婦女致成羣肆惡飭掘家屬方許就雇成都屬德陽仁壽二縣南北距數百里駐一把總永寧協駐貴州永寧城中隔河東隸黔西隸蜀兵民歧視應更定汛守命會總督岳鍾琪議行又奏請嚴捕竊賊及博奕之具上諭曰禁令弗行咎在不公不明不在不嚴法猶藥也取攻疾而已過峻厲則傷元

氣徒猛不足貴也又奏嚴治建昌降番劫掠又奏省城設防火堆棚管置救火兵二十上並嘉之六年請於提標及城守等營各設義塾上諭曰文武不可偏重少年聰穎稍通文墨勢必流爲怯懦不願爲兵則營伍所餘皆魯鈍一流是非興文實乃廢武邀虛名而無實益將焉用之烏蒙米貼苗婦陸氏爲亂發永甯遵義兵援勦四川雷波土司楊明義陰助陸氏誘附近結覺阿路阿照平底諸苗劫糧陸氏既擒請勦明義令廷桂率總兵張耀祖率兵往軍至拉密擒明義並獲造謀人卑租及結覺曾雙尺阿路曾魯佩及阿不羅曾覺過斬賊近萬上諭曰覽奏斬賊何啻獵人弋獸倣兵退仍復如故豈有盡行殺戮之理當詳思善於措置之道師復進攻確里密阿都阿驢諸苗礮殪確里密曾利耶阿都苗擒其酋阿必以獻阿驢苗降七年奏軍事竟上以効忠奮勇嘉之尋疏陳苗疆地方諸事上命籌善後復奏湖北容美土司田雯如在四川界徵花絲銀咨湖北察究上諭曰楚蜀諸土司容美最富強越分僭禮應曉以大義漸令革除又奏籌勦瞻對土司上諭曰瞻對雖微亦不可輕視凡事概以敬慎出之奏請

開採黃蠟等處銅鉛以資鼓鑄上諭曰黃蠟雷波與新撫涼山諸夷錯壤第宜示以靜鎮胡可興起利端若聽民開採流亡無籍之徒必羣相趨赴釀生事故速會同巡撫憲德將金竹坪白蠟山諸地銅鉛礦廠概行封禁脫至紛紜黃廷桂憲德之身家性命不足贖其辜也廷桂奏引罪復以詳慎申戒之尋奏捕得妖言罪人楊大銘等言其渠楊七匿酉陽土司所已檄令擒獻上諭曰此事尤宜詳慎朕料酉陽土司未必爲此事八年奏於楊隘噴獲楊七非酉陽境內上諭曰朕非有過人技但較汝等克誠克公耳人有利害是非之心遇事接物非過卽不及惟公與誠爲對證之藥十二月奏獯亂發兵攻克金鎔關黑鐵關黃草坪諸地恢復水善得旨獎許上嘗諭憲德令密陳廷桂爲人奏稱多疑偏聽好勝矜人是其病痛上終以實心任事嘉之九年師討噶爾丹策零分設四川總督卽以命廷桂仍兼領提督奏請將四川常平倉捐穀改銀上諭曰四川本產米地積貯尙易遽請開捐誤矣且欲改穀作銀又將銀買穀更轉輸滋弊當另議增貯十年六月奏建昌鎮轄竹核當涼山之中爲苗疆腹心要地請於附

近各險隘增兵設鎮上命大學士鄂爾泰詳議尋議兵力宜合不宜分蠻巢宜遠不宜近但使我勢聯絡不必隨處設防請於竹核設兵三千分駐呼姑格落魚紅大赤口阿都沙馬普雄諸地敕下廷桂行之八月兒斯番爲亂奏遣總兵趙儒勦捕上責廷桂從前未料理妥協十月廷桂奏言雍正五年兒斯番爲亂臣檄副將王剛按治時臣甫到川地利夷情尙未諳習今凶鋒旣肆由臣撫馭無方已遵旨密諭趙儒潔遵料理十二月擒兒斯番並勦定河東各寨勾結諸番復奏言王剛前所懲創不過兒斯一堡今仰蒙指示趙儒督勵將士一切險巢重地深林石穴悉行蕩平上深獎之十三年奏貴州古州苗亂四川建昌永寧俱與連界已飭將吏加意撫輯上諭以不動聲色靜鎮慎密乾隆元年裁總督缺廷桂仍爲提督十二月召詣京師二年授鑾儀使尋授天津總兵五年遷古北口提督六年上幸熱河道古北口閱兵營伍整肅賜廷桂馬並上用緞尋授甘肅巡撫十二年署陝甘總督十三年授兩江總督疏言江西俗悍有司因循姑息動輒喧閤飭嚴捕究治又言南方晴少雨多各營操練開曠令於陰雨

時擇公所或寬敵寺宇操練上諭曰汝至江南整飭振作但不可欲速要之以
久可也十五年加太子少保疏劾江蘇巡撫雅爾哈善以奏銷錢糧奉旨訓飭
知縣許惟枚等經徵未完不及一分例止罰俸忽奏請奪官人必以爲出自上
意居心巧詐雅爾哈善下吏議十六年調陝甘總督時四川復分設總督十八
年仍以命廷桂奏四川歲豐穀賤上命轉輸二十萬石振淮揚被水州縣御製
詩紀其事進吏部尚書留總督任四川涪江諸縣引江水溉田餘多山田每苦
旱廷桂奏飭通省勘修塘堰新都蘆山等十州縣及青神蓮花壩樂山平江鄉
三壩南明鎮次第修舉悉成夙壞二十年奏請增爐鑄錢爲通省修城上諭曰
有益地方之事詳妥爲之授武英殿大學士仍領總督事打箭爐徵外孔撒麻
書兩土司構毀金川緯斯甲布祖麻書革布什叩德爾格式祖孔撒互攻殺廷
桂偕提督岳鍾琪飭諭解散六月復調陝甘總督師討阿睦爾撒納陝甘當轉
輸孔道廷桂途次以軍中調取營馬並令州縣採買馬駝卽飭各驛馬十調五
六得馬數千匹佐軍尋奏軍中文報責成沿邊提鎮料理詔如所請二十一年

四月命駐肅州督辦軍需奏言各處調解軍馬口外嚴寒自安西至哈密經戈壁十餘站餉飲不時每致疲斃現派專官分站料理將積貯草豆經過匹數住歇時刻行走臆分按日呈報又奏山西解駝先留安西牧放陝西解馬亦先調甘肅飼養陸續前運以濟實用先後送軍前駝馬七萬餘又言西北兩路軍營向通商販後因撤兵禁止巴里坤軍營應用牛羊諸物專自肅州販往路遠價昂難資接濟請照舊通商上命籌濟庫車阿克蘇糧運廷桂奏夾山一路可自哈密直趨闕展吐魯番其間騾駝通行水草饒裕較繞行巴里坤爲近擬卽運糧貯吐魯番轉運軍營往返更加迅速又發銀二十萬解阿克蘇買回城米運糶十萬儲巴里坤凡所經畫屢合上指十二月上諭曰廷桂於西陲用兵雖未身歷行陣而籌辦軍需每有朕旨未到旋即奏至與所規畫不約而同體國奉公精詳妥協而又毫不累民內地若無兵事其功最大積功自太子太保進少保自騎都尉進三等忠勤伯先後賜雙眼花翎紅寶石帽頂四團龍補服白金二萬二十四年正月駐涼州以病劇聞命額駙福隆安率御醫診視甫行廷

桂卒上卽命福隆安奠醑御製詩輓之賜祭葬諡文襄喪還上復親臨奠醑二十五年凱宴成功將士追念廷桂復賦詩惜之尋命圖形紫光閣御製懷舊詩列廷桂五督臣首孫檢官副都統乾隆四十九年以刻廷桂奏疏載兩朝批答被殿旨申飭曾孫文煜自侍衛累擢副都統調馬蘭鎮總兵

鄂彌達鄂濟氏滿洲正白旗人初授戶部筆帖式雍正元年授吏部主事累遷郎中五年命同廣東巡撫楊文乾等如福建察倉庫六年擢貴州布政使八年遷廣東巡撫疏言烏鎗例有禁瓊州民侍槍禦盜請戶得藏一多者罪之梧州民陳美倫等謀亂捕治如法十年署廣東總督疏言總督舊駐肇慶所以控制兩粵令專督廣東應請移駐廣州饒平武舉余猷等謀亂捕治如法尋賞授總督安南民鄧文武等遇風入銅鼓角海面鄂彌達畀以資送歸國國王以伽南沈香諸物爲謝卻之疏聞上獎其得體先後疏請移設將吏又疏請於三水西南鎮建倉貯穀並以米貴會城設局平糶又請升程鄉縣爲直隸州名曰嘉應皆報可十三年命兼轄廣西仍駐肇慶貴州台拱苗亂鄂彌達發兵令左江總

兵王無黨率以赴援復發兵駐黔粵界上諭獎之乾隆元年高宗命近鹽場貧民販鹽毋禁鄂彌達疏言廣東按察使白映棠未遵旨分別老幼男婦發粟稱四十斤以下不許緝捕致奸徒借口成羣販私上獎鄂彌達洞悉政體解映棠任尋奏廣東鹽由場配運省河及潮州廣濟橋轉兌各埠請令到埠先完餉銀開倉後繳鹽價下部議行御史薛福修奏廣西團練鄉勇並設孺童義學下鄂彌達議二年奏言團練鄉勇不若訓練土司兵於邊疆有益孺童義學詔連等屬已有成效應聽如所奏尋又疏言惠潮嘉應三府州民多請州縣給票移家入川臣飭州縣不得濫給並遣吏於界上察驗又疏言貴州新闢苗疆總督張廣泗奏設屯軍墾田臣以今苗威安貼將來生齒漸繁地少人多必致生怨又恐屯軍虐苗激變請撤屯軍於附近防守其田仍給苗民上諭曰所見甚正廣泗首尾承辦此事持之甚力朕則以爲終非長策也四年調川陝總督疏言榆林邊民歲往鄂爾多斯種地牛籽具種日用皆貸於鄂爾多斯秋收餘糧易牛羊皮入內地變價重息還債請於出口時視種地多寡借以官銀秋收以糧抵

俾免借貸折耗之苦倉儲亦可漸充上從之又請發司庫銀十萬買穀分貯沿邊又請修甯夏渠道並加築沿河長隄又奏安西鎮遠兵駐防哈密承種屯田在城兵僅數百年來商民日增請視涼州柳林湖例募流民及營兵子弟墾田撤兵回城差操均如議行五年兩廣總督馬爾泰劾知府袁安煜放債病民並及鄂彌達縱僕占煤山事上解鄂彌達任召詣京師尋授兵部侍郎六年授寧古塔將軍調荊州九年授湖廣總督疏言武漢濱江城郭民田賴有堤以障請於武昌蕎麥灣增築大隄安陸沙洋大隄增築月隄襄陽老龍石隄加備歲修銀十一年上以鄂彌達不稱封疆召詣京師十五年授吏部侍郎十六年授鑲藍旗漢軍都統二十年授刑部尙書著直隸總督二十一年兼管吏部尙書協辦大學士二十二年加太子太保二十六年卒子白金二千治喪賜祭葬諡文恭

楊廷璋字奉峨漢軍鑲黃旗人世襲佐領雍正七年自筆帖式授工部主事再遷郎中授廣西桂林知府乾隆二年擢左江道十五年擢按察使二十年遷湖

南布政使二十一年授浙江巡撫上南巡諭曰西湖水民間藉以溉田今聞沿湖多占墾湖身漸狹田畝廢竭已開墾成熟者免其清出不許再侵占廷球因奏此類田地多礙水道請概令開濬歸湖沿岸栽柳俾根株盤結亦可固隄又請帑疏濬湖州七十二澗洩水入太湖免田地被淹又奏仁和錢塘蕭山三縣江塘視海塘例以二十丈爲準按段編號立石仁錢二縣江塘民房堤岸外餘二十餘里視海塘例每里設堡夫一建堡分防均從之又請開台州黃巖場沿海地近場歸甯近縣歸民戶以百畝爲率分限起科得腴產十萬畝奏入嘉許二十四年授閩浙總督請改設螺洲大頭崎烏龍江諸地塘汛又奏內地商船出洋發給船照又奏臺灣穀賤內地歉收民每偷渡就食請酌寬米禁往來臺廈橫洋船准運米二百石塘船六十石自鹿耳門出至廈門入皆給照察驗臺灣與生番接壤前總督楊應琚飭屬勘界挑溝築土牛以杜私墾至是廷璋議彰化淡水與生番接壤依山傍溪挑溝築土牛爲界並於沿邊設隘寮分兵駐守二十六年同福建巡撫吳士功奏劾提督馬龍圖借用公使錢並以龍圖

已歸歎請用自首例減等上責其錯謬下吏議奪官七功成巴里坤廷璋留任二十八年加太子太保旋授體仁閣大學士留總督任二十九年廷璋入覲福建水師提督黃仕簡奏廈門商舶出入官署受陋規上命尙書舒赫德侍郎裘曰修往按具得廷璋令歷任廈門同知代市人蔭珊瑚珍珠未發價狀命解任下吏議奪官上以廷璋平時尙能任事授散秩大臣未幾授正紅旗漢軍都統工部尙書三十年命署兩廣總督三十一年安南捕盜竄入小鎮安土司怕懷隘官兵捕得廷璋照會安南道頭人視行誅安南復報其國隘口盜發請遣兵堵截廷璋遣兵守隘事上聞具言防邊宜鎮靜上戒以邊地夷情當審度事理因時制宜若專務持重養癰貽害弊不可勝言也夏雌州安岐黎爲亂擾客民廷璋檄鎮道捕治並奏客民編保甲禁放債黎民市易設墟場熟黎令薙髮民出入黎峒必譏以杜後患上從之又奏小鎮安改設通判南界接安南於那波者賴者欣三村建卡設兵怕懷隘爲小鎮安門戶設兵巡緝打面梁與雲南接界建卡防守下部議行師征緬甸雲貴總督楊應琚以疾聞上令廷璋赴永昌

佐應琚治軍三十二年疏報應琚病愈仍回廣東任尋召授刑部尚書三十三
年授直隸總督加太子少保秋濬沱水盛漲廷璋請於正定西南築隄築城西
北築埽並以護城又奏勘任邱濱淀諸地以楊各莊諸地最低請改種稻田文
安窪修築隄埝並於龍潭灣諸地開隄洩水並從之三十四年請撥通倉米十
二萬運各災區平糶又奏乾隆二十四年濬沱南徙舊河淤墊上年大漲河行
故道東鹿木邱傾井諸村遂成巨浸請裁灣取直並修築護城隄埝報聞三十
六年復召授刑部尚書預香山九老會十二月卒年八十四贈太子太保賜祭
葬諡勤愨

莊有恭字容可廣東番禺人乾隆四年一甲一名進士授修撰直上書房後三
年弟有信成進士引見有恭以起居注侍直上問及之有恭選庶吉士兄弟同
請告省親有恭累遷侍講學士擢光祿寺卿以父憂歸服除擢內閣學士遷戶
部侍郎督江蘇學政充江南鄉試考官復督江蘇學政十六年授江蘇巡撫十
七年署兩江總督疏言太倉鎮洋沿海田廬賴海塘保障前巡撫高其倬議自

寶山湖口港至昭文福山港築土塘三萬四千七百餘丈僅築湖口港至劉河南岸土石塘今年秋令風潮劉河南賴以無恙其北頗致損傷士民自請挑築惟恐一時難集工不速竟應築土塘九千丈有奇請借庫銀一萬六千兩令自募夫役於伏汛前畢工按畝扣輸二年清款如所請行有恭督學政時浙人丁文彬獻所著文武記太公望傳等有恭以爲病狂置不問至是文彬以書上衍聖公孔昭煥昭煥告巡撫楊應琚以聞有恭疏請罪坐刑學政養廉銀十倍十九年御史楊開鼎條奏江南收漕諸弊敕有恭覆奏尋疏言江南收漕諸弊以蘇常松鎮太五屬爲尤甚已酌定條例勒石漕倉遇收漕飭糧道以下官周巡察訪開鼎言需索不遂借詞米不如式勒令曬晾篩颺漕糧上供天庾自應乾圓潔淨儼不如式不堪久貯必致貽誤倉儲糧戶良頑不等每次青腰白臍潮嫩雜碎諸米強交如令更易卽造作浮言挾制自應分別察究不得但責官吏取悅刁民上獎其言公正二十一年丁母憂命予假百日回籍治喪於伏汛前至淮安署江南河道總督秦興縣有朱聘者坐主使殺人罪至絞乞贖罪有恭

許之臨行疏聞上責其專擅令家居待罪總督尹繼善又言有恭監臨鄉試察
出有賄謀聯號者復有以鬪螞蟻致訟者皆令罰鍰以罰上命奪有恭官速詣
京師下大學士九卿論罪當絞上以贓不入己貨之令護母喪回籍後赴軍臺
効力方詣謫所命戴罪署湖北巡撫二十四年調浙江二十五年勅杭州將軍
伊領阿副都統劉揚達違例乘橋上奪伊領阿等官獎有恭命議叙三月疏言
紹興南塘嘉興乍浦塘並屬要工臣赴山陰勘得宋家樓爲三江曹娥二水交
會又適當潮汐之衝爲南塘首險已改建石塘鞏固復至蕭山龜長等山越南
大登至海甯中小登登文堂葛壘諸山勘海甯南門外西過戴家石橋東至陳
文港工長五千丈有奇根址堅實不須重建其必當修築者千六百餘丈內七
百七十餘丈殘缺過甚作爲要工餘次第興修自陳文港東至尖山下有韓家
池柴塘四百丈有奇亦應重築復循海而北自海鹽至平湖徧歷乍浦塘海鹽
東臨大海南有台駐北有乍浦諸山山趾角張縣城以一面當潮汐城外石塘
最爲險要間有沖損已令隨時修補六月又疏言西塘胡家兜至海甯南門外

潮退沙漲長十八里前請辦戴家石橋要工既有新沙外護應先就迤東工段
趨辦再審量沙勢分別緩急九月又疏言緩修各工陳文港十丈合用魚鱗式
逐層整砌圓通巷前十丈仍如式堅築廿里亭西二十五丈修整坦面加用排
椿合緊貼塘身二十六年十二月又奏言海甯西塘老鹽倉諸地經嘗伏兩汛
老沙汕刷宜先事預防先後拆鑲二百丈自霜降後臣往來察勘見柴工兩塘
交接處水已臨塘自此迤西老沙仍多坍塌請將接連前工七十丈從速鑲辦
均從之二十七年上南巡臨視老鹽倉尖山諸地令修築柴塘並設竹簷坦水
諸工九月疏報海甯塘工竟上嘉有恭能盡心命議叙是秋多雨水漲有恭以
嘉湖兩府水歸太湖河道多淤下流尤壅劇因請浚烏程長興境內七十二澗
並遣吏至江南按行三江故道九月調江蘇巡撫上命浙江海塘工程仍責成
有恭專司其事並免學政任內應罰銀二十九年擢刑部尙書留巡撫任有恭
疏請大修三江水利略言太湖北受荆溪百澗南受天目諸山之水爲吳中巨
浸而分疏之大幹以三江爲要三江者吳淞江婁江東江也東江自宋已湮明

永樂間別開黃浦寬廣足當三江之一今亦謂之東江三江分流經吳江震澤吳元和崑山新陽青浦華亭上海太倉鎮洋嘉定十二州縣境其間港浦縱橫湖蕩參錯大概觀之無處不可分洩然百節之通不敵一節之塞太湖出水口不特寶帶橋一處如吳江十八港十七橋吳縣鮎魚口大缺口爲湖水穿運河入江要道今不無淺阻又如入吳淞之龐山湖大斜港九里湖澱山湖激浦向來寬深近以小民貪利徧植芡蘆圍築魚蕩亦多侵佔劉河古婁江也今河形大非昔比舟楫來往必艱舟待潮崑山外濠爲婁江正道淺狹特甚蘇州婁門外江面僅寬四五丈偶遇秋霖衆水匯集江身淺窄先爲潦水所占俟其稍退然後湖水得出爲之傳送而上游已漫淹矣東南財賦重地水利民生大計若及早爲之事半功倍今籌治法當於運河西凡太湖出水之口皆爲清釐占塞俾分流無阻其運河東三江故道惟黃浦現在深通但於泖口挑去新漲蘆墩足資宣洩吳淞江自龐山湖以下婁江自婁門以下凡有淺狹阻滯之處宜治寬深令上流所洩之數足相容納其江身所有植蘆插籬及冒占之區盡數

剷除嗣後仍嚴爲之禁則水之停蓄有所傳送以時並卽以挑河之土加培岸見在駮座去海太近難於啓閉者酌量改移庶渾潮不入清水盛強而海口之淤亦將不挑而自去總計所需雖覺浩繁然散在十二州縣通力合作實亦無多民間聞有此舉咸樂趨事願以民力爲之但分段督修仍須官董其成且工費繁多若待鳩財而後興工稍稽時日懸發帑興工仍於各州縣分年按畝徵還則民力旣紓工可速集奏入報可於是選紳耆賦工役先疏橋港次及河身茭蘆魚蕩之圍占者除之城市民居之不可毀者別開月河以導之工始於二十八年十二月至二十九年三月告竟用公帑二十二萬有奇三十年正月命協辦大學士仍暫留巡撫任南巡復賜詩褒勉八月召詣京師有恭劾蘇州同知段成功縱役累民奪官讞未定巡撫明德察成功實受賄詐稱病按察使朱奎揚知府孔傳柯皆知之不以言上命奪奎揚等官逮訊三十一年正月罷有恭協辦大學士又遣侍郎四達按治得有恭授意奎揚等有意從寬狀並奪有恭官下刑部獄軍機大臣會鞫並追繳學政任內應罰銀二月軍機大臣等

職上有恭罪應斬諭改監候八月命原之授福建巡撫三十二年卒仍免追繳學政任內應罰銀

李侍堯字欽齋漢軍鑲黃旗人二等伯李永芳四世孫也父元亮官戶部尙書諡勤恪侍堯乾隆初以廕生授印務章京見知高宗累遷至正藍旗漢軍副都統十七年調熱河副都都二十一年擢工部侍郎調戶部署廣州將軍勳前將軍錫特庫廢弛馬政錫特庫下吏譏奏定廣州滿洲漢軍駐防官制兵額二十一年署兩廣總督奏廣東各屬買補倉穀兼雜上中下三等而報以上價應碾米用上穀應借糶用中下穀上諭以所言洞悉情弊諭各省督撫嚴飭州縣買補當碾試務得上穀又請禁廣東制錢攪和古錢並吳三桂偽號錢事上諭以前代錢仍聽行用吳三桂利用偽號錢令民間檢出官爲收換供鼓鑄之用又奏廣州駐防出旗漢軍官兵曠米平糶便民上從之二十三年守備張彬佐禁村兵演劇被毆奏請飭職上謂未得懲創惡習之意應先治刁民後議劣弁庶刁悍之徒知畏懼二十四年實授總督奏廣東各國商船所集請飭銷貨後依

期回國不得住冬商館毋許私行交易毋許貸與內地行商資本毋許雇內地
廝役二十五年又奏粵海關各國商船出入例於正稅船鈔外有各種規禮應
請刪除名色併爲歸公銀若干各口僕役飯食舟車諸費於此覈銷並下部議
行廣西巡撫鄂寶以貴縣獠民章志剛不法知縣石崇光察報避重就輕誦奪
官上以事由崇光察報命毋奪官侍堯奏先經面諭崇光體勘始行察報上令
逮崇光按鞫又奏志剛實無不法事崇光猜疑妄報仍奪崇光官上以侍堯與
鄂寶各懷意見飭以秉虛公除習氣二十六年召授戶部尙書正紅旗漢軍都
統襲勳舊佐領二十八年授湖廣總督奏湖廣行銷准鹽擡債病民請酌中定
價命兩淮鹽政高恒赴湖廣會議奏請按准商成本酌加餘息明定限制從之
加太子太保二十九年調兩廣總督右江鎮總兵李星垣坐婪賄得罪命侍堯
按鞫擬絞上以侍堯管薦星垣今擬罪輕縱責侍堯回護坐降調以愛遠京師
署工部尙書三十一年調署刑部三十二年回兩廣總督任襲二等昭信伯三
十四年師征緬甸命侍堯傳檄暹羅時暹羅方爲甘恩敕所據侍堯以爲不宜

傳檄以己意宣諭暹羅各夷目密偵緬甸苟入境令擒以獻上雖之豐順民朱阿姜謀爲亂督吏捕治三十八年授武英殿大學士仍留總督任安南內亂令廣西鎮道嚴防入覲賜黑狐端罩四十年兵部以廣東民糾黨結盟不數月至五起當追論武職弛縱罪侍堯奏言武職既協緝復追論弛縱罪則規免處分必致陪爲消弭兇徒轉得漏網請寬之上從其請並諭曰侍堯此奏意在挽回積習然亦惟侍堯向不姑息屬僚朕所深信始可爲此言若他人未可輕爲倣效也四十二年雲貴總督圖思德奏緬甸投誠籲請納貢上命大學士阿桂往莅其事並調侍堯雲貴總督緬甸頭人孟幹謁侍堯請緩貢侍堯偕阿桂奏孟幹等語反覆遵旨斷接濟絕偵探示以威德不予遷就上召阿桂還緬甸歸所留守備蘇爾相侍堯遣詣京師緬甸乞遣孟幹等還侍堯諭令歸所留按察使銜楊重英上嘉其合機宜四十三年奏獲緬甸遺越州民入關爲謨送京師尋奏永昌普洱界連緬甸擬每歲派兵五千五百在張鳳街三臺山九龍口諸地防守上諭以揆度邊情不值如此辦理侍堯復請於杉木隴設大汛撥騰越兵

五百千崖設小汛撥南甸兵二百輪駐巡防並分守虎踞銅壁等關從之四十五年雲南糧儲道海寧訴侍堯貪縱營私狀命尙書和珅侍郎喀寧阿按治侍堯自承得道府以下餽賂不諱上震怒諭曰侍堯身爲大學士歷任總督負恩婪索朕夢想所不到奪官逮詣京師和珅等奏擬斬監候奪爵以授其弟奉堯又下大學士九卿議改斬決上心欲寬之復下各直省督撫議各督撫多請照初議定罪獨江蘇巡撫閔鄂元迎上意奏侍堯歷任封疆幹力有爲請用議勳議能之例寬其一綫上乃下詔謂罪疑惟輕朕不爲己甚改斬監候四十六年甘肅撒拉爾回蘇四十三爲亂上遣大學士阿桂視師特旨予侍堯三品頂戴孔雀翎赴甘肅治軍事甘肅冒賑事發總督勒爾謹得罪命侍堯領總督事會阿桂按治勒爾謹及前布政使王賢望布政使王廷贊蘭州知府蔣全迪皆坐斬上命諸州縣侵冒二萬以上擬斬決一萬以下斬候於是臬蘭知縣程棟等二十人皆坐斬四十七年奏臬蘭等三十四廳州縣虧庫帑八十八萬有奇倉糧七十四萬有奇請於現任總督以下各官養廉扣抵歸補上命寬免又請豁

免節年民欠三十萬兩旋命予見任品級頂帶加太子太保四十九年廣東鹽商譚達元訴侍堯任兩廣時總商沈冀州欽派公費餽送上命尙書福康安按鞠請罪侍堯上責侍堯償繳公費免其罪蘇四十三亂既定上屢諭侍堯密察新教回民至是鹽茶廳回田五等復爲亂侍堯會固原提督剛塔捕田五田五自戕得其孥誅之無何田五之徒復攻靖遠侍堯駐靖遠令剛塔督兵往亂久未定上命大學士阿桂尙書福康安視師渭城陷西安副都統明善戰死賊據石峯堡上責侍堯玩延怯懦奪官仍在軍効力督餉侍堯旋督兵赴伏羌福康安至軍發侍堯玩愒貽誤諸罪狀速熱河行在王大臣按鞠擬斬決上仍令從寬改監候五十年諭釋之署正黃旗漢軍都統署戶部尙書湖北江陵民訴知縣孔毓楨侵賑命侍堯往按奏言毓楨未侵賑但治賑遲緩坐奪官命署湖廣總督奏上年孝感被災饑民劉金立等掠穀生員梅調元糾衆毆殺金立並生擿二十三人上逮前總督特成額及知縣秦橫等治其罪未幾實授五十二年入覲臺灣民林爽文爲亂調侍堯閩浙總督駐蚶江時前總督常青督兵渡臺

討侍堯以兵力不足調廣東浙江兵濟師又慮賊據笨港劫糧械撥繕船分防
鹿耳門鹿仔港上獎以籌濟有方亂久未定上以常青非將才命福康安爲將
軍督師並寄諭常青全師以歸待福康安至再籌進取侍堯恐常青宣露上旨
人心惶惑節錄發寄并具疏請罪上大悅獎以深合機宜得大臣體賜雙眼孔
雀翎福康安劾提督柴大紀上責侍堯徇隱五十三年侍堯亦奏大紀貪劣諸
狀自請治罪上寬之臺灣平命仍襲伯爵建福康安等生祠於臺灣命侍堯居
福康安海蘭察之次復命圖形紫光閣列前二十功臣侍堯短小精緻過目成
誦見屬僚數語卽辨其才否攤几高坐語所治肥瘠利害或及其陰事若親見
人皆悚懼屢以貪黷坐法上終憐其才爲之曲赦五十三年疾聞命其子侍衛
毓秀往省旋卒諡恭毅弟奉堯自官學生襲勳舊佐領授藍翎侍衛累遷江南
提督四十五年襲伯爵四十六年調福建陸路提督以漳泉累有械鬥左授馬
蘭鎮總兵五十二年署直隸提督山東學政劉權之移家舟經靜海被盜下吏
議上以署事未久且隨扈熱河寬之五十三年侍堯還襲伯爵加奉堯提督銜

五十四年卒諡愼簡子毓文乾隆六十年侍堯督雲貴與局員通同偷減錢法事發奪毓秀伯爵命毓文承襲

伍彌泰伍彌氏蒙古正黃旗人副將軍三等伯阿喇納子伍彌泰以雍正二年襲爵授公中佐領擢散秩大臣遷鑲白旗蒙古副都統十五年賜伯號曰誠毅二十年授涼州將軍旋命以將軍銜駐西藏辦事二十四年代還授正藍旗蒙古都統出爲江甯將軍二十七年上以伍彌泰不勝任召還仍爲散秩大臣命協辦伊犁事務哈薩克越境游牧師逐之出塞上以伍彌泰不諳軍務令隨行學習二十八年命往烏魯木齊辦事築精河屯堡上賜名曰綏來三十一年代還署鑲黃蒙古正白漢軍兩旗都統授內大臣三十五年命往西甯辦事郭羅克土番劫洞庫爾種人行李伍彌泰遣兵逐捕得行李以還奏聞上以未痛剿責伍彌泰怠忽三十八年改駐西藏辦事四十一年代還擢理藩院尙書兼鑲白旗漢軍都統出爲綏遠城將軍調西安四十三年伊犁將軍伊勒圖請以屯田無眷屬之兵次第撤回下伍彌泰議選陝甘綠營兵三千携眷屬以往四十

五年班禪額爾德尼詣京師命伍彌泰護行仍還西安四十六年撤拉爾回蘇四十三等爲亂陷河州上命伍彌泰選兵千人備徵發伍彌泰奏提督馬彪已率兵赴河州擬選滿洲兵千繼往上以所奏與諭旨合深嘉之上命大學士阿桂視師督軍攻華林山梁命伍彌泰駐龍尾山爲聲援回亂旋定捕得阿渾五有海潮宗者嘗出降彪遣往開諭遂留從亂上責伍彌泰等不先奏聞下吏議奪官上寬之四十八年授吏部尙書協辦大學士鑲白旗蒙古都統充上書房總譜達四十九年上巡江浙命留京辦事授東閣大學士上以伍彌泰年逾七十命與大學士嵇璜蔡新俱日出後入朝風雪沍寒免其入直五十年預千叟宴五十一年卒贈太子太保賜祭葬諡文端伍彌泰治事知大體班禪額爾德尼至京師王大臣多和南稱弟子伍彌泰護行與抗禮官保烏雅氏滿洲正黃旗人初授刑部筆帖式擢堂主事累遷郎中乾隆七年授江南江寧知府十一年總督尹繼善奏官保不宜外任復授刑部員外郎轉郎中改御史擢刑科給事中巡視臺灣二十二年擢鑲黃旗漢軍副都統往西藏辦事二十六年授刑

部侍郎三十年調工部三十二年復往西藏辦事察知糧務通判吳元澄以庫銀貿易上以官保初至藏卽察奏嘉其急公讞實論斬歷正紅旗蒙古滿洲都統理藩院刑禮戶諸部尙書三十四年協辦大學士上幸熱河命留京辦事三十八年調吏部四十一年以年逾八十乞休命致仕卒賜祭葬諡文勤

論曰廷桂嘗言事英主有法若先有市惠好名黨援諸病上所知便一事不可行其言深中高宗之隱被眷遇宜矣侍堯眷遇尤厚屢坐贓敗屢屈法貸之蓋特憐其才非以其工進獻也阿彌達廷璋皆以不謹聞亦未竟其罪有恭撫江浙治海塘重水利有惠於民其被譴尙非有所私視侍堯輩故富勝伍彌泰雖未嘗領疆寄久於邊徼恩被延登在當時亦勞臣也因附著之

清史稿

列傳一百十一

方觀承

富明安

周元理

字潤

李瀚

李世傑

袁守侗

字大進

劉峨

陸燿

管幹貞

字允

胡季堂

方觀承字遐毅安徽桐城人祖登峰官工部主事父世濟康熙四十八年進士官內閣中書僑居江甯坐轂名世南山集獄並戍黑龍江觀承尙少寄食清涼山寺歲與兄觀永徒步至塞外營養往來南北枋腹重趼數年祖與父皆沒益困然因是具知南北阨塞及民情土俗所宜厲志勤學爲平郡王福彭所知雍正十年福彭以定邊大將軍率師討準噶爾奉爲記室世宗召入對賜中書銜師還授內閣中書乾隆二年充軍機處章京累遷吏部郎中七年授直隸清河道署總督史貽直奏勘永定河工上諭之曰方觀承不穿鑿而有條理可與詳

酌八年遷按察使九年命大學士訥親勘浙江海塘及山東江南河道以觀承
從尋擢布政使十一年署山東巡撫十二年回布政使任十三年遷浙江巡撫
十四年擢直隸總督兼理河道十五年加太子少保二十年加太子太保署陝
甘總督二十一年回直隸任觀承撫山東時議以安山湖畀民承墾升科奏言
湖中尙有積水但二麥布種於水已涸之後收穫於水未發之先故雖有水患
民願承墾升科升科後官徵民納例重秋禾秋禾被水請蠲請賑請豁徒致紛
繁卽如南旺湖亦經尋臣條奏畀民承墾臣從訥親履勘見卑處水涸高處如
屋如巖意謂水不能及臣至山東方知夏秋間運河及汶水暴漲賴以分減運
道得保無虞凡大川所經衆水所注其宜洩瀦蓄之區恒閱數年數十年有若
閒置一旦實得其用未可以目前忘久遠安山湖亦運河洩水地應視南旺湖
例夏麥秋禾分季收租除去升科名目應徵應免悉從其宜國利而民亦不病
又奏義倉與社倉同爲積貯但社倉例惟借種義倉則借與賑兼行而尤重在
賑設倉宜在鄉不宜在城積穀宜在民不宜在官秋稔告豐勸導輸納歲終將

穀數奏明不必聞具管收除在則其數不在官法可行久撫浙江海塘引河出
中小壑安流北大壑沙漲成陸觀承燧勸丈出地三十五萬餘畝畝界民承墾又
以引河既出中小壑民間失地以附近村地二萬餘畝撥補復察各地鹹氣未
除民不能卽耕合竈戶以未種地交民承佃使竈戶得租貧民得地分疏以聞
上嘉之督直隸二十年治績彰顯以兼理河道治水尤著勞勩直隸五大河永
定河渾流最難治觀承初上官卽疏言永定河自六工以下河形高仰請就舊
有北大隄改移下口庶水行地中暢下無阻上諭以改移下口不可輕言明年
春上臨視永定隄御製詩示觀承大指謂河隄但可培厚不可加高略移下口
取易於趨下亦補偏救弊之策是夏永定河南岸三工汗溝奪溜上以江南河
道總督高斌豆瓣集漫口圖示觀承觀承奏豆瓣集爲中河餘水漫溢故可於
水緩處施工永定河若但堵月隄溢水無歸路仍塞漫口偏溜入引河復故道
上諭之又明年春疏言永定河下口掣溜出冰窖壩口請卽於坦坡坵尾東北
斜穿三角淀開引河入葉淀自鳳河轉入大清河廷議以時初過凌汛慮盛漲

陝沙淤淀令觀承覆奏奏言冰窖壩口掣溜在上七工尾低於正河丈二三尺南距南坦坡北距北大隄有漫衍而無衝溢此地勢之順也水由壩出非衝決亦非開放民情不怨此人事之順也凌汛改移經理有暇此天時之順也今日必應改移不復稍存歧見至慮盛漲挾沙淤淀渾水至三十里外水渙沙停當無此慮且臣亦嘗計及故不使東循龍尾直入鳳河而引入葉淀迂其途而廣其地更可經久無患上命尙書舒赫德河東總督顧琮會勘如觀承議自是永定河下口出冰窖居二年復疏言永定河下口漸淤請於北岸六工尾開隄放水至五道口導歸沙家淀仍自鳳河入大清河廷議以甫改冰窖下口何以又請於北岸六工開隄放水令觀承覆奏奏言冰窖改口後水勢暢順上年盛漲下口十里內淤阻今請於北岸六工放水循南壩而行仍以鳳河爲尾閘實於見在情形爲便自是永定河下口又改自北岸六工入鳳河旋請以鳳河東隄及韓家埝隄永定河道又請於下口北壩外更作遙壩爲勻沙散水之用並加築鳳河東隄與遙壩相接觀承治永定河凡再改下口相時決機從之輒利河

決長垣東明命觀承往勘疏言二縣以太行隄爲衝其地南高北下河南陽武諸縣水北注賴此隄捍之康熙六十年後屢被衝決請於隄西開新引河導水入舊引河東注卽以所起土別築新隄命如所議觀承疏請治子牙河自楊家口至閻兒莊改支河爲正河復於閻兒莊北循隄濬新引河接黑港舊引河俱於子牙橋北入正河疏請治漳沱河自晉州張岔山口改流南出甯晉入滏陽河當順新道疏請治漳河自臨漳東南改流趨大名分支一出城北一流入河間當於河口築壩斷水南流疏淤滏河引水歸故道皆如議行又疏滏易州安國河開渠灌田賜名曰安河上以河南巡撫胡寶琮督民間繕治道路溝洫令觀承仿行觀承方令諸州縣以工代賑修隄埝濬減河築疊道凡三十二州縣旣奉命奏言正定順德廣平大名等地民力易集近年漳漆滏沱諸水疏通他處亦先後開工要使瀝水有歸農田杜患逾年疏報自大興宛平東至撫甯西至易涿西南至望都東南至阜城復循運河自武清至吳橋凡二十二州縣築疊道開溝渠諸工皆竟直隸北境東自熱河西至宣化皆接蒙古界流民出塞

耕蒙古地永定河改道冰密之歲土默特貝子哈木噶巴和斯呼朗圖議驅民收地觀承疏言貧民無家可歸卽甘受驅逐而數萬男婦內地亦難於安置請簡大臣按治上遣侍郎劉綸等往勘議仍用原定年限語詳綸傳是歲理藩院尙書納延泰議撤多倫諾爾舖司毋占蒙古游牧觀承奏多倫諾爾自設舖司文移資送郵解餉得棲止行旅亦堪投宿並無礙於游牧今於南茶棚上渡轉山子水泉子諸地量留屋宇如或藏匿匪類資所司究治觀承復請熱河編立煙戶令有司稽察附近敖漢奈曼翁牛特土默特諸部副都統歲周巡理藩院議商人領票赴恰克圖庫倫貿易不得往喀爾喀各旗私與爲市並禁張家口設肆觀承疏言禁張家口設肆商人赴恰克圖庫倫者日少內地資蒙古馬羊皮革蒙古亦需內地茶布有無不能相通未見其益請令商人領票赴恰克圖庫倫仍許經過喀爾喀各旗相爲交易但不得久居放債礙蒙古生計御史七十五請於多倫諾爾收稅觀承奏內地茶布自張家口往毋庸重徵惟恰克圖庫倫等地互市及克什克騰木植當於多倫諾爾徵稅右衛兵移駐張家口觀

承疏言歲支米粟不敷一萬四千餘石請以宣化懷來懷安蔚西甯五州縣徵豆改粟米出糶至張家口糶米可得八千餘石又以領催前鋒馬兵歲米五之一改折加給俾兵食有資而轉輸可省兵部議以張家口副將隸察哈爾都統觀承疏請將邊外七汛隸都統左衛懷安仍隸宣化鎮漕船自清江至通州天津爲南北運河樞鍵二十二年漕船遲至上命觀承督民船起剝觀承於北倉設席囤貯米令交兌船泊北倉南起剝船泊北倉北皆傍東岸一幫限二里同時起米不相妨西岸行空船計日畢事疏請發庫帑給腳價明歲新漕歸款二十四年上以北運河水淺截先到漕艘留米四十萬石貯北倉觀承疏言前幫截留後幫繼進爲日無多請以剝爲截令先到各幫每船剝若干使得輕便餘米仍抵通州交兌應截五六百船全米勻爲千船半米俟河水漲發繼進之船浮送無阻諭獎其妥協上以各省錢費用山東布政使李渭議禁富民積錢家限五十串觀承奏富民積錢勢不能按戶而察之與其限所積不能稽所入請令交易在三十兩以下者許用錢過是卽用銀違者收以官價富民積錢諭令

易銀違者以十之二入官至尋常出入應各從其便上問成效若何觀承言富戶錢漸出市值亦平減廷議各省糶米商人往往藉口昂值下觀承駁議觀承疏請需米省分具款交產米省分令有司代購則牙僧不敢抗地方官教令操縱自如疏並下部議行觀承督陝甘董理儲胥送駝馬運糧茶上敕以安速爲要方冬疏言哈密至巴里坤大坂積雪遣兵剷除請日加剷四兩在陝甘四閱月卽返直隸觀承莅政精密畿輔事繁重乘輿歲臨幸往來供張值西征師行具營幕芻糧未嘗少乏軍興而於民無擾尤勤於民事嘗請以永定河淤灘隄內外留十丈備栽柳取土餘畀守隄貧民領耕輸租又請以永定河葦地改藝秋禾又以麥田牧羊奏請申禁又舉木棉事十六則爲圖說以進上爲題詩濟渠叠道工竟又請將樂城柏鄉內邱定興安肅望都諸縣改築甌城涿州拒馬河橋圯令改建石橋又重建衡水縣西橋請賜名安濟政無鉅細皆殫心力赴之二十八年上命勘天津等處積水責觀承玩誤下部議奪官命寬之御史吉夢熊朱續經交章劾觀承上諭曰觀承在直久存息事甯人之見前以天津等

處積水未消予以懲儆而言者動以爲歸過之地直隸事務殷繁又值災歉措
置不無竭蹶言易行難持論者易地以處恐未必能如觀承之勉力支持也三
十年上南巡賜詩三十三年病瘡遣醫診視八月卒賜祭葬諡恪敏御製懷舊
詩入五督臣中子維甸自有傳

富明安富察氏滿洲鑲紅旗人初授筆帖式累遷戶部郎中乾隆十一年授廣
東惠潮嘉道歷廣東高廉糧驛廣西蒼梧諸道福建廣西按察使二十六年遷
江西布政使請以南昌同知通判二員定一員爲滿缺專司繙譯清文上以江
西無駐防滿洲兵不允二十八年命往巴里坤辦事三十二年廣東巡撫明山
劾富明安官糧驛道浮收倉米奪官逮京師鞠治事白復官命署山西布政使
三十三年護巡撫劾雁平道時廷藹縱僕擾民坐奪官擢山東巡撫疏言高密
百脈湖受五龍河膠河諸水夏秋常苦泛溢請濬引河引膠河北入膠萊運河
涸出新地得四百餘頃上嘉之太僕寺少卿范宜賓奏請裁減東省閉塲後驛
夫工食富明安疏言水驛夫役終歲在驛閉塲多在十一月開塲有早至正月

者中間相距兩月餘而銅鉛諸船守凍尙須守護節省無多窒礙轉甚非政體所宜從之三十五年疏言小清河行章邱鄒平長山新城高苑博興樂安七縣六百餘里源出章邱東至新城高苑間分支北爲支脉溝又東至博興分支南爲豫備河至樂安入淄水歸海比年湖泊淤塞春夏水漲民田常被其害現就樂安境內挑淤培隄並疏濬南北支渠使支幹通流建頡而下博興樂安可復膏腴章邱鄒平長山新城高苑諸縣附近湖泊涸出有益於民民咸願出力興工毋庸動帑諭曰有利於民事在應爲但不可滋弊耳三十六年又奏濟甯西北當運河西岸受上游曹州境內諸水以運河勢高不能洩水入運遂至間段停積飭濬舊有五渠使南匯昭陽湖並同時修治沂水涑水墨河響水諸渠二十餘處及運河東岸徒駭馬頰諸河洩漲水入海上以知勤民之本嘉之三十六年授閩浙總督調湖廣三十七年京山民嚴金龍父子爲亂捕得置諸法卒贈太子太保諡恭恪

周元理字秉中浙江仁和人乾隆三年舉人十一年以知縣揀發直隸補茲縣

調清苑以總督方觀承薦擢廣東萬州知州改霸州以修城未竣留清苑會有部省符僞劄馳傳者察其奸詰問具服事上聞上才之調易州擢宣化知府母憂歸上屢出巡幸畿輔當其衝宮館驛傳車馬芻牧諸役主辦非其人往往爲民厲奏起元理董其事服闋補廣平調天津又調保定擢清河道邊按察使再遷布政使三十六年命從尙書裘曰修總督楊廷璋勸青縣滄州減河用元理議請撤岡改用滾水壩並定每歲測量疏濬從之旋授山東巡撫奏小清河發源章邱長白山至樂安溜河門入海章邱至博興有濟山清河諸泊爲納水之區請先將二泊濬深開廣遇水發時有所停蓄然後聽其入河分注歸海並於每年農隙疏濬下游各河未半載擢直隸總督三十七年疏言直隸兩多河漲行潦無歸行旅多滯民間隄埝衝決田廬受患請用以工作賑例勘修衝途諸州縣叠道並濬良鄉茨尾雅河新城雄縣盧僧河修新城清河雄任邱獻諸縣隄埝上遣尙書裘曰修按行直隸河工元理與合疏言直隸諸水千丈萬派總由三汊河爲入海之道全資西岸叠道置橋穿運而東匯入海河出口西岸舊

有橋十一今擬添建橋九俾無壅遏上游不至受害格淀隄自富城以下改爲
魯道酌添涵洞使行水暢順子牙河下游澄清不使清河受淤詔如所請雄縣
民訴知縣胡錫瑛私鬻倉穀上遣員修及侍郎英廉按治得實論罪上諭曰直
隸治賑周元理奏言有司料理妥實今有雄縣事所稱妥實者安在下吏議奪
官命留任三十八年加太子少保三十九年八月山東壽張民王倫爲亂破壽
張堂邑陽穀犯東昌及臨清奪糧艘爲浮橋欲渡運河上以畿南地相接敕守
要害元理馳至放城令布政使楊景素總兵萬朝興副將瑪爾清阿以兵千二
百駐臨清西岸遏其衝大學士舒赫德率禁旅討賊賊渡西岸犯我師瑪爾清
阿擊敗之賊潰復合又爲我師所敗進奪浮橋賊退保臨清舊城元理令朝興
督兵助攻倫自焚死亂旋定尋與侍郎兼順天府尹蔣賜棨勘八旗在官荒地
請招佃承墾八年後起租沮洳庫下之區並爲開溝洩水下部議行四十年元
理年七十召至京御書榜賜之四十一年與學政羅源漢請熱河增建學校四
十三年上命改熱河爲承德府令元理籌畫疏請改設州一縣五增置官吏如

制並請開附近潘家口汛煤窯四十四年坐井陘知縣周尙親勅派累民民上
訴元理請罪民上命尙書福隆安按治責元理袒護奪官予三品銜令修正定
隆興寺自贖尋授左副都御史仍著直隸總督四十五年遷兵部左侍郎擢工
部尙書四十六年引疾歸四十七年卒令江蘇布政使致祭元理爲治舉大體
泛愛兼容時以有長者行重之爲方觀承所識拔時同入薦劾者曰李湖亦有
名湖字又川江西南昌人乾隆四年進士初授山東武城知縣調郟城累遷直
隸通永道調清河道遷直隸按察使再遷江蘇布政使三十六年擢貴州巡撫
三十七年調雲南四十年總督彰寶以貪婪得罪責湖隱忍緘默不先劾奏奪
官予布政使銜往四川軍營會辦軍需奏銷四十三年授湖南巡撫四十五年
調廣東湖敏於當官在貴州規畫鉛運在雲南釐剔銅政均如議行所至以清
嚴爲政其洩廣東以廣東夙多盜番禺沙灣菱塘近海爲盜藪密詞姓名居址
及出入徑途知辜盜以七月望歸設祀飭文武吏圍捕旬日間誅爲首者二百
有奇而釋其餘從盜風以息旋條奏申明員弁責成編船移汛設施甚備令行

法立民咸頌之贈尙書銜諡恭毅祀賢良祠

李瀚字文瀾漢軍鑲黃旗人少孤母苦節食貧撫以成立瀚選入咸安宮肄業雍正十年舉人充景山官學教習乾隆十三年授山東榮城知縣二十三年遷膠州知州在官八年民頌其惠築隄曰李隄立石紀焉三十一年擢武定知府大水乘小舟勘賑幾溺卒竟其事徒駭河久塞請發帑浚治自是連歲無水患三十四年擢兗沂曹道覈防河諸費歲節以萬計而隄益堅三十六年擢江西布政使奏請停編審上諭曰丁銀旣攤入地糧滋生人丁遵康熙五十二年聖祖恩旨永不加賦各省民穀細數督撫年終奏報五年編審不過沿襲虛文應永行停止護巡撫戶部用湖南布政使吳虎炳議禁小錢並及古錢瀚奏收買小錢二千四百餘斤古錢僅四十餘斤前代流傳銷磨殆盡應援兩江總督高晉奏准例聽民間行使如有私鑄古錢仍與小錢一例查禁從之又奏言時憲書按省刊載太陽出入晝夜節氣時刻今江南分江蘇安徽湖廣分湖北湖南陝西分甘肅請添註省名分晰開載如所請行四十年授雲南巡撫行至貴州

道卒

李世傑字漢三貴州黔西人少儻喜騎射年二十餘折節改行乾隆九年入
貲爲江蘇常熟黃泗浦巡檢知縣李永書引與同堂聽訟縣人稱其平總督尹
繼善巡撫莊有恭薦卓異遷金匱主簿有恭檄充巡捕官爲入貲以知縣留江
蘇二十二年除泰州知州始至訟未結者四百餘案晝夜據案視事不五月報
結巡撫陳宏謀荐堪勝知府二十七年擢鎮江知府上命裁京口駐防漢軍世
傑捐廉集資人予餉三月衣一襲裁者三千人皆分畀職役三十年擢安徽寧
池太廣道丁父憂服闋三十六年授四川鹽驛道未幾擢按察使師征金川總
督桂林檄世傑駐打箭爐督約哨路軍需木果木之敗副將軍阿桂全師暫退
軍中餉銀數萬巨錠募運還無應者世傑令曰委于賊寧散于民從軍貿易者
數萬人爭取立盡世傑督隊護其後密檄關吏見持餉銀入口者皆令還官錢
酬以給銀五兩帑發全師復鑄礮缺炭檄世傑督辦世傑令伐樹剗木城卡
衝掘地爲大窰數十復伐樹而薪焉不旬月炭足供鑄守禦僧格宗發敵伏俘

十六人以還阿桂以聞賜孔雀翎四十年擢湖北布政使仍留軍督餉四十二年金州平乃上官四十四年擢廣西巡撫丁母憂四十六年命署湖南巡撫服闋真除四十七年調河南大學士阿桂督塞青龍岡決口疏引河上命占用民田當安頓調濟世傑尋奏請以北岸湖山地畝劃給南岸占用民田四十八年奏引河新築南隄捐廉種柳別疏釐定防護新河將吏官制遷四川總督四川自軍興後徵調賦斂無藝倉庫如洗世傑潔己率屬休養生息俾漸復舊觀上嘗舉世傑功風厲諸省世傑疏劾酉陽知州吳申州民入湖廣界爲盜不卽捕治上諭曰四川盜匪前此大加懲創地方安靜乃復有焚殺搶劫之事皆世傑因循玩愒所釀成傳旨申飭甘肅回復亂世傑奏遣川北總兵富祿率兵赴接建昌總兵魁麟防昭化廣元上以回亂漸定諭世傑鎮靜五十年世傑年七十入覲與千叟宴州縣捕金川逃兵不力例奪官仍留任准調不准升世傑奏請准令指復上嚴斥之下吏議旋又允陝西巡撫何裕城請命世傑免議湖廣饑告糴於四川世傑請以近水次諸州縣常平倉穀碾米三十萬石旣浙江亦告

黜世傑以浙江視湖廣遠運米濟賑緩且不及又請以備應湖廣糴米撥十萬石先濟浙江上嘉世傑得封疆大臣體命議叙五十一年調江南總督世傑避疾乞解任上不許秋大雨河決司家莊偕安徽巡撫書麟河道總督李奉翰籌工費請開捐例上諭之曰戶部庫銀尙存七千餘萬帑藏充盈足敷供億世傑何必爲此鯁鯁言利之舉捐納未嘗無人才而庸流因之並進博騰仕一二年後得廉俸過於所出國家並無實際銓政官方兩無裨益此奏不可行尋復命大學士阿桂莅工及冬工乃竟五十二年狼山鎮陳杰疏言各營火藥短少上命察覈世傑奏鎮屬鹽城等五營硝磺缺額磺產山西例二年一次採運近因運使歲需烟盒磺銀催解不前不能如例以致支絀上諭曰硝磺軍火要需向俱採辦足額以兩江而論安徽據奏足額何獨江蘇短缺兩淮年例歲不過烟盒七架大小爆竹一萬所需能幾有司採運遲延以此卸罪世傑以此率涉支飾令兩淮鹽政徵瑞會同料理世傑尋劾江甯布政使袁鑾於各屬磺價尙未解齊誤將運使烟盒價牽叙下吏議又以河督題報葦蕩營新淤灘地產柴數

與案不符責世傑未察覈世傑復借徵瑞奏言硝磺缺額由採運稽遲請將歷任布政使議處上諭曰世傑等本當治罪但事涉上供從寬降鑒江甯知府停世傑養廉三年并能兩准例進烟盒爆竹復調四川總督五十三年巴勒布夷爲亂據西藏屬岳拉木濟噶上命世傑撥駐防綠營及明正巴塘裏塘德爾革爾諸土司兵赴西藏而世傑得駐藏大臣慶林牒已發駐防綠營兵及屯練降番合三千人令提督成德等率以行奏入上命毋發明正巴塘裏塘德爾革爾諸土司兵世傑奏奉諭已令諸土司發兵諸土司近尙安靜既調復停恐番性生疑仍令備調上嘉世傑相機妥辦不拘泥遵旨解御佩大小荷包賜之世傑又奏發米萬三千三百石運西藏足敷兵食上褒世傑盡心命移駐打箭爐迭疏報成都將軍鄂輝率兵千二百入藏副將那蘇圖率屯練五百駐打箭爐尋以巴勒布夷遠遁諭世傑還成都五十四年秋審四川原定緩決刑部政情實者凡七案上責世傑寬縱以其老且平日治事覈實免議世傑薦川北道明安引見上以其年衰改主事世傑下吏議世傑以病請解任上令侍衛慶成借

際診視賜人葭並令自審病輕則來京重則回籍五十五年三月入覲授兵部
尚書賜紫禁城乘肩輿江蘇句容吏侵蝕錢糧清米上責世傑在兩江未覺察
命以原品休致回籍五十九年卒年七十九賜祭葬諡恭勤世傑仕而後學摘
發鈎距必得要領上每言其不通文理然屢褒其能事禮遇優厚世傑長子漳
州知府華國早卒上降詔慰勉其孫舉人再瀛會試未中式令一體殿試授禮
部主事及世傑入爲尚書再瀛病卒召其次子知州華封授員外郎俾奉侍華
封官至兩廣鹽運使

袁守侗字執冲山東長山人乾隆九年舉人入資授內閣中書充軍機處章京
遷侍讀再遷吏部郎中考選江西道御史授浙江鹽驛道二十八年遷廣西按
察使奏言煙瘴充軍人皆凶悍請分被泗城鎮安甯明東蘭諸地解役疏脫斬
絞重囚短解問徒長解問流各署書役貼寫幫差濫收滋弊請量定多寡分別
汰留又言卓異官滿臬道府甫到任未三月停止出結部議均從之三十四年
丁父憂服闋命以三品京堂仍充軍機章京補太僕寺卿遷吏部侍郎調刑部

命如雲南按布政使錢度貧婪狀論如律三十八年兼署禮部命在軍機大臣
上學習行走兼管順天府尹復命如雲南按保山知縣王錫供給總督彰寶虧
空兵糧論如律調吏部又命如貴州按總督圖思德勦鎮遠知府蘇瑋貪婪狀
罪至死暫署貴州巡撫又如四川按松岡站員冀谷錫侵蝕軍米論如律四十
一年遷戶部尙書復命如四川按富德濫用犒軍銀卽監詣京師賜黑狐端罩
四十二年調刑部命如甘肅勘驗指收監糧復命借兩江總督高晉籌堵儀封
漫口四十四年奏言遵兜袖法築兩壩以期迴溜分入引河又與高晉會奏引
河頭去口門稍遠開引溝三百餘丈直達引河繪圖奏聞上所擬引河向南
恐紆迴不能得勢於圖內侏筆標識令向北改直尋奏壩工墊陷兩壩鑲築兜
收遊諭將引河頭西首淤灘切去俾溝口向西北開寬引溜下注四十四年授
河東河道總督調直隸總督四十五年疏請修築北運河筐兒港減水石壩四
十六年甘肅監糧弊成大獄上以守伺勘險不實下吏議奪官命留任丁母
憂去官四十七年諭勘浚伊家河疏山東積水守伺詣勘奏請自善橋以北抵

楊家樓長七千餘丈展寬浚深堵築缺口拆改礙水橋座諭速行辦理尋復授直隸總督四十八年卒贈太子太保賜祭塋諡清愨鄭大進字退谷廣東揭陽人乾隆元年進士授直隸肥鄉知縣累遷山東濟東道二十九年山東淫雨高唐茌平諸縣水漲阻道大進相度宣洩水不爲患巡撫崔應階薦其能遷兩淮鹽運使三十六年丁父憂去官服除上召至熱河命署浙江按察使尋授湖南按察使四十年遷貴州布政使四十三年授河南巡撫四十四年調湖北旋署湖廣總督奏安陸荊州二府濱臨江漢以堤爲衛今夏漲發鍾祥潛江荊門江陵隄決已一律修復惟潛江長一坵地窪沙積築隄難固應擇地勢較高處築月隄鍾祥永興保安諸坵地當衝亦應築月隄俾水發江寬不致出險又有劉家巷隄應併修築四十五年奏武昌濱江上游諸水匯流繞城而東江漲衝刷隄根虛懸見修武昌城畢請併修隄毋使水蓄城均從之又奏言湖廣邪教爲害總督班第奏請枷責發落俾免株連牧令遂視爲自理詞訟率不通詳請自今以後據實呈院司駁辦諱匿徇縱者劾之上睦其言四十六年授直隸總督

命勘永定河工奏言六工以下河身內舊有民居乾隆十五年給價遷移又以
下口改流奏令暫回繳原給房價減糧田畝依舊徵收今勘南北兩岸自頭工
至六工村落已盡遷移六工以下水勢遼徙靡常累將北堤改築展寬南北兩
堤並隔五十餘里其中居民五十餘村水漲以船爲家應令遷移永清柳坨諸
村東安孫家坨諸村旗民二百八戶已勘定地址令陸續移居河身較遠之村
仍准暫住禁築壩修房以杜占居報聞四十七年二月賜孔雀翎黃馬褂五月
奏保定九龍河經清苑安州至任邱入淀年久積淤請舊有望都營開殷家營
高嶺村三閘外於望都樊村建石閘一清苑冉村鄧村營頭建石閘三並修整
諸舊閘開濬安州新安任邱諸縣河皆稱旨加太子少傅卒賜祭葬諡勤恪劉
峨字先資山東單縣人入資授知縣乾隆二十三年選直隸曲陽知縣調宛平
盧溝橋有逆旅多陰戕過客沒其財峨發其奸西山煤礦多藏匿亡命峨散其
黨與先後捕治實諸法三遷通水道以母憂歸起天津道仍調通水道以父憂
歸未一年上命署清河道服闋真除四十五年遷湖北按察使石首有寡婦兄

公謀其產誣之死於獄峨治官書發其枉逮其兄公至親鞫論如律四十六年
遼安徽布政使調山西四十八年擢廣西巡撫甫兩月遼直隸總督輔國公弘
最遣僕至靜海冒佔入官地事聞上諭峨遇王公以下私遣人干有司無問是
非曲直卽據實奏聞長蘆鹽政徵瑞奏漕艘至楊村以民船剝運鹽運遲誤上
謂非特鹽運遲誤且恐商貨壅滯令峨赴天津與徵瑞議民船編號輪雇照例
發價並定赴通回空限期下部議行分疏劾中倉監督趙元摺嗾毆民至死三
河知縣王治岐那用旗租並論如律謁避暑山莊祝嘏賜孔雀翎黃馬褂南宮
民魏玉凱訴縣人李存仁習邪教上遣侍郎姜晟會鞠存仁坐誅玉凱妄及無
辜論戍四十九年上遣尙書金簡會勘蘆溝橋下游沙淤請於中泓五孔抽溝
三道上以抽溝水緩命中泓五孔全行疏濬徵瑞請指銀三十萬造剝船濟運
上以直隸木材少命湖廣江西二省分造峨奏言北倉存漕四十餘萬俟新造
剝船到齊先行運通上許之五十一年七月廣平民段文經元城民徐克展爲
亂夜入大名成大名道熊恩緞峨奏聞卽督兵馳往捕治得從亂者王國柱等

自列向習八卦教及文經克展蓄謀爲亂狀上令峨捕文經克展久之未獲累降旨詰責十月河南巡撫畢沅奏於亳州獲克展檻送京師而文經終未能得五十二年命停義本年廉俸山東學政劉權之迎眷屬赴官途遇盜峨坐奪官命留任五十三年命偕山東巡撫長麟等勘議糧艘在德州剽運五十五年巡城御史穆克登額等獲建昌盜自列嘗劫建昌錢鋪有同爲盜者繫清苑獄二一年未決上責峨廢弛遣侍衛慶成逮清苑知縣米復松詣京師下刑部論罪奪峨孔雀翎黃馬褂降調兵部侍郎未幾擢尙書五十六年命如河南按虞城民訴縣役事又如江西按廣豐武弁包漕崇義民發冢棄骸事並訊明論如律峨至崇義入深山中勘冢地江西民稱之五十七年從上幸熱河賜還孔雀翎黃馬褂六十年以疾乞解任加太子少保原品休致卒賜祭葬諡恪簡

陸燿字青來江南吳江人乾隆十七年舉人十九年考授內閣中書充軍機處章京奉職勤慎有急務立辦大學士傅恒深器之上出巡幸俱令扈從累遷戶部郎中三十五年出爲雲南大理知府以親老請改補近省調山東登州府三

十六年調濟南上書巡撫徐績請留南漕廣積貯三十七年授甘肅西甯道燧乞績代奏乞假送母居京師上命改授運河道上書河道總督姚立德言兗州泰安二府泉四百七十八當濬渠導泉俾由高趨下其流不絕又言運河例歲冬閉壩春挑濬天寒晷短民役俱憊宜修復南旺濟寧臨清月河並於彭口南岸亦開月河歲九十月漕艘商舶皆從此行以其時疏濬運河皆用其議又請修河渠成運河備考三十九年壽張民王倫爲亂去濟寧二百里有欲閉城者燧不可曰寇未至閉城示之怯也且何忍拒吾民使散逸被賊害且曾誘耶乃募鄉兵助守坐城闔任稽察事旋定四十年擢按察使燧議以流犯罪輕請免其解司四十二年擢布政使燧議流外壅積請停分發皆從之燧母老病狂疾奏乞解任終養上許之四十六年丁母憂運河築隄上以燧習河務命往山東會運河道沈啓震董其役四十八年命署布政使服闋兵除四十九年擢湖南巡撫湖南鹽商例有餽蛟卻之命平鹽價如其數疏請增嶽麓城南二書院膏火又疏請申親老告養例請敕各督撫不論現任試用通飭呈明終養又奏湖

南社會前巡撫劉埔令湘陰等四十五縣勸捐得穀十二萬勒限賤催僅耒陽等十五縣交齊餘未足數者十七縣全未交者十三縣如湘陰巴陵武陵諸縣濱臨江湖地多磽瘠桂陽漣溪辰谿諸縣介在山僻民鮮蓋藏若執前捐數目責令全完民間未嘗借貸之益轉受追呼之擾請凡現在未收者停止催繳上允其奏燿以病請解任旋卒燿自幼立志以古人自期學兼體用居官廉儉入覲門吏留裝物索資燿乃置衣被城外而假於友覲已還之初至長沙總督特昇額以閱兵至見燿方午食惟菽乳蔬蔬訝之燿曰天不雨方齋故所食止此特昇額怒其奴曰吾館舍酒肉臭何不以祈雨告還館舍命悉撤去

管幹貞字松崖江南陽湖人乾隆三十一年進士改庶吉士授編修考選貴州道御史巡視西城訟牒皆親判周行郊內外捕治諸不法者先後命巡漕天津瓜儀凡十二年累遷至光祿寺卿幹貞以清船回空多守凍打冰令先通下游免上游冰下注益增堅厚後遂守其法疏言運河以諸湖爲水櫃誠使節節疏通駐遇旱澇可以節宣否則兩少無籌濟之方兩多無容水之地至引黃入運

係一時權宜苟疏濬得宜黃河全力下注運河自不致停沙又奏請治駱馬湖使運河水有所蓄洩並得旨議行邊內閣學士五十三年擢工部侍郎五十四年授漕運總督糧艘至天津楊村每以水淺須起搬運丁不能給舟值例由長蘆鹽運使以需鹽錢貸運丁借直隸藩庫銀歸款運丁分年繳納其後議停運丁多不便幹貞請如舊例又疏陳江西軍丁疲敝請籌款增補行月二糧折價借官銀代償積逋令分年輸納寬限清盤屯田俾藉以調劑並從之五十五年賜孔雀翎黃馬褂疏言漕艘百餘幫役夫數萬人最易藏奸生事上年新漕飭嚴立規條行必按伍止則支更親行督察乃知別有奸人隨運潛行督飭捕治數十人交州縣確擬嚴懲得旨嘉獎五十八年疏言蘇州太倉押運官例批准後改委赴通中途分更互相推諉請自水次抵通始終其事庶官有專司又請河南豁免緩征停運減存船隻就近赴山東受雇搬運又請各幫水手短絳責成頭舵工丁以素誠誠實之人充補免聚眾竊盜諸累皆報可各省開兌多至春初又在在逗遛遇水淺或河溢有在河北度歲者幹貞嚴飭弁丁修船受兌

復冬兌春開舊制糧艘起運每策馬督催風雨不避或不歸所乘舟支帳露宿
微弁出力必親慰勞運丁舟人不用命立予懲罰當時或苦其苛急及回空省
費無絲毫派累咸大悅服高宗嘗召見褒其能謂可亞楊錫紱五十九年以疾
乞假命兩江總督書麟攝其事疾愈任事如故幹貞成進士時禮部改貞爲珍
六十年命仍原名嘉慶元年戶部議江浙白糧全運京倉以羨米爲耗浙江運
丁如議交運幹貞以江南餘米較少執議不行交部嚴議奪官三年卒子遷羣
官浙江巡撫蔣兆奎字聚五陝西渭南人自副貢生補甘肅張掖縣教諭乾隆
三十一年成進士三十三年教諭俸滿授四川合江知縣調灌縣丁憂師征小
金川攻熱耳總督富勒渾奏留兆奎從軍駐達烏圍治饑既破熱耳移饗往俄
大金川助亂兆奎知熱耳不足守復移糧達烏圍已而他所糧悉被焚將軍阿
桂才兆奎使駐日隆治餽兼司令礮局旋調署華陽加知州銜四川盜賊喇嘛
子擾尤溪兆奎捕得盜渠獲首犯服闋遷山西澤州同知擢太原知府以巡撫
農起薦擢河東鹽運使五十四年遷按察使仍兼理鹽務尋遷甘肅布政使越

五十六年高宗八旬萬壽兆奎入祝嘏時河東商因兆奎議改鹽課歸地丁上命如山西同巡撫馮光熊勘議旋議山西陝西河南三省應納正雜課四十八萬餘兩均入三省行鹽完課納稅百七十二廳州縣地丁兩加九分有奇下部議行五十七年上以河東鹽價減銷暢兩三月內發販鹽數倍於往年商民交便褒兆奎始終承辦收效甚速賜孔雀翎旋授山西巡撫五十九年迎蹕賜黃馬褂六十年以山西錢賤請停寶晉局鑄錢從之嘉慶元年詔與千叟宴尋命毋詣京師仍加恩資奏劾汾州知府張力行挾訟事婪索冀寧道鄧希曾等廻護同官奪力行官命兆奎按鞫又發力行侵帑狀坐斬二年以病乞解任歸四年高宗崩兆奎入臨卽授漕運總督固辭不許旋奏言整頓漕運要在卹丁今陋規盡革旗丁自可節費而生齒日繁諸物昂貴旗丁應得之項實不敷用急須調劑前讀上諭有漕州縣無不浮收江浙尤甚每石加至七八斗歷來交納視爲固然今若劃出一斗津貼旗丁餘悉革除所出有限所省已多不特千萬旗丁藉資濟運卽交糧億萬花戶皆沾恩無窮疏入上嫌事近加賦飭與有漕

省分各督撫另議調劑兆奎疏言各督撫所議調劑有名無實兩江費漕所奏不敷運費江蘇擬四升七合安徽擬二升焉能有濟因力請罷斥上責兆奎粗率並諭加賦斷不可行此外如何設策善後令再覈議兆奎奏請每船借給銀百兩於各糧道庫支領分三年以旗丁應領之項扣還山東河南兩省路途較近減借五十兩有漕各省本有輕齋原應銀米斗折銀五分請仍徵本色按照旗丁米數分給白糶無輕齋請通融勻給上以所擬損民益丁巧避加賦之名仍存加賦之實遣侍郎鐵保會淳詳察兆奎又奏旗丁運費本有應得之項惟定在數十年前今物價數倍費用不敷近年旗丁尙可支持者以州縣浮收向索兌費並折收行月等米以之貼補一切經費今革除漕弊浮費可省兌費不能減臣才識短淺惟恐貽誤求上別簡賢員原從小心敬畏而來不敵氣質用事上卽命鐵保代兆奎召授工部侍郎尋授山東巡撫御前侍衛明安泰山進香還京師奏山東有司私餽銀八百並及途中營汛墩房坍塌上以詰兆奎兆奎復奏辯且稱老病求去上怒其忿激念廉名素著降三品卿銜休致七

年卒

胡季堂河南光山人侍郎煦子初以廕生授順天府通判改刑部員外郎遷郎
中山爲甘肅慶陽知府再遷甘肅按察使調江蘇江蘇按察使移駐蘇州而獄
猶在江甯季堂請更置報可乾隆三十九年擢刑部侍郎四十四年遷尙書季
堂屢奉使諸省讞獄直隸吉林江蘇皆一至山東四至河南再至察得唆訟者
嚴治之有誣訴論如律不稍貸初使河南按商邱獄上諭之曰季堂河南人按
本省事尤當秉公持正勿以事涉大吏慮將來報復稍爲瞻顧商邱民湯聚五
迫婦劉爲妻劉絕食死其獄已題旌劉父猶陳訴並及順刀神拳會民事察
得唆訟者罪之使山東按平度獄州民羅有良與人鬪誤蹴其母死萊州知府
徐大榕原勘無誤乃坐是奪官當平反得旨嘉獎再使山東暫署巡撫山東災
請截本省漕米治賑還京師加太子少保再兼署兵部尙書嘉慶三年授直隸
總督賜孔雀翎四年仁宗親政季堂疏發和珅罪狀尋請以籍沒其僕呼什圖
米麥萬餘石分借文安大城被水村民長新店監發上責季堂廢弛劾太子太

保奪孔雀翎下吏部議奪官去頂帶留任河南內黃知縣陶象柄獲長新店首盜季堂奏聞上嘉季堂不邀功還頂帶又獲從犯還孔雀翎是時川楚陝教匪爲亂五年季堂奏教匪稽誅臣聞經略額勒登保參贊德楞額秦等由川而楚而陝而甘數千百里窮追接戰輒勝是教匪所恃不在勢衆而在得間能逃也川楚陝連界崇山峻嶺斷澗深溝在在險阻教匪竄匿其間劫掠而食不煩裹糧追民前驅不煩招集官兵至轍翻山越澗而逃官兵必先運糧又須探路諸費周章卽道路可通餼糧可繼而日夜追躡奔走其勢必疲是教匪逸而兵勞也臣愚以爲當先嚴守要隘俾教匪無路可奔乃宣上德意散其脅從然後隨之以兵分道進剿教匪途窮食盡計日可平聞陝省有團練鄉勇或一二村或數村聯合築堡爲聲援川楚可推而行之令各守本境俾自護其田廬婦子則教匪雖多驟難肆擾官兵勦撫兼施無顧此失彼之慮上諭曰所論極是總之能堵方能剿能剿方能撫大端不外乎此尋以病乞解任還太子太保卒贈太子太傅遣御前侍衛豐仲濟倫奠醢諡莊敏子鈺進士直隸清河道鑄湖南鹽法

道

論曰牧民於平世自庶而求富修水利飭農功其先務也觀承殫心力於是政行畿甸富明安元理瀚皆以此爲急各著績效幹貞籌運道尤重行水世傑起下僚介而能恕燼以學爲政所施未盡其蘊季堂論治教匪後來堅壁清野之議已發其端我有先正言明且清諸臣所論列足當之矣

清史稿

列傳一百二十一

李清時

字立

李宏

字

何焯

字

吳嗣爵

薩載

蘭第錫

韓鏞

李清時字授侯福建安溪人大學士光地從孫乾隆七年進士選庶吉士授編修十四年授浙江嘉興知府上南巡或議自嘉興至杭州別闢道行民舟清時於官塘外求得水道相屬上通吳江平望下達杭州壩子門號爲副河丁父憂去官服除授山東兗州知府二十二年擢運河道二十六年河決孫家集運河由夏鎮至南陽兩隄俱潰清時督修築議者或擬用椿掃費以六十萬計或擬建石隄費以三百萬計清時少時行瀕海間見築隄捍海爲田者擲碎石積水中潮退則以木闌之填土其上堅築成隄因參用其法以河東西兩岸皆水得土難令以石壘兩旁積葑其中水涸募夫起土置積葑上費帑十四萬有奇而

兩隄成曹縣溢水瀉入微山湖出韓莊湖口開溢水不得洩令於開北毀石隄掘地深之以洩水事上聞命於其地建滾水壩高一丈二尺餘清時請減低爲一丈令湖水落至丈乃閉閘蓄水泗水經兗州西流入府河濟甯城東舊有楊家壩遇水使入馬場湖蓄以濟運遇伏秋水漲不能洩淹民田令改壩爲閘視水盛衰爲啓閉汶水分流入蜀山馬鬮兩湖舊制引水使南行少北行多後乃反之漕船經袁口靳口淺澀不能進清時規分水口令南壩加長北壩收短以爲節宣並減低何家壩使汶水南弱而北增蜀山湖出口爲利運金縷二閘舊制開金縷資南運清時令移金縷在利運北使蜀山湖水先濟北運壽張境有沙趙二水阻運河不得入海舊於運河東岸建三空五孔橋又於八里廟建平水三橋使二水盛漲有所洩清時議減低三空五孔橋又於八里廟增建滾水壩使漲未盛卽洩不爲范濩壽張東阿諸縣民田害總督方觀承行河用其議二水始宣暢衛水自館陶至臨清與汶會舊有閘盛漲不能禦清時令於閘南富汶衛交流處築壩仍歲加高厚又議拓四女寺滾水壩尙書葑曰修行河

川其議衛河得安流二十九年調江南淮徐道三十年權河東河道總督賜其母大緞貂皮清時以河隄歲修司其事者每不度形勢過高糜帑而卑薄者不能大有增益乃飭所司當水漲各具隄高水面尺寸呈報擇隄最薄者培之迨伏秋水發耿家寨稱十四堡水及舊堤上賴豫增新築以免清釐河工徵料諸弊歲減派料至千餘萬斤三十一年運河東岸漫口自請議處原之三十二年七月授山東巡撫高苑博興樂安三縣被水清時謂小清河下流隘故上游溢檄所司勘驗遽疾作乞解任不許三十三年卒清時治水善相度情形窮源竟委每乘小舟出入荒陂叢澤支流斷港中或徒步按行諮訪必得要領乃見諸建置姚立德字次功浙江仁和人祖三辰官吏部侍郎立德以廕生授主事乾隆十二年外授江寧通判遷知直隸景州州俗有人市鬻奴婢奉就牙僧估其值如牲畜然親死三日祭城隍廟獄曰哭廟立德諭禁之陋俗以革累遷山東按察使者河東河道總督按行工次見陽武汛十七堡諸地土鬆浮疏請築牛餞培堤使堅山東運河兩岸獨山南旺馬場昭陽徽山諸湖每伏秋盛漲水不

能容爲豫籌善洩壩開塞剛啓閉惟其時三十九年實授加兵部尙書銜高雲龍者內監高雲從弟也立德入雲從言舊之臨清州爲廉從坐遠依結交近侍律論斬命奪官仍留任陽穀民王倫爲亂立德分守東昌城圯難守引運河水繞城壕恃以爲固檄發倫先墓磔其屍四十四年饑封河決屢築屢衝命奪官仍留工効力自贖四十五年責令回籍旋發往南河補淮安裏河同知四十八年卒

李宏字濟夫漢軍正藍旗人監生入資授州同効力河工授山陽縣外河縣丞累遷宿虹同知乾隆十六年授河庫道尙書劉統勳劾河員虧帑事連宏解職事白留工二十二年發直隸以河務同知用總督尹繼善疏請留南河侍郎夢麟勘治六塘河以下以宏從尋復補河庫道丁父憂命在任守制二十七年調淮徐道二十九年擢河東河道總督奏言山東運河資湖水接濟今秋雨少飭早閉臨運各閘又言微山湖蓄水濟運韓莊湖口閘水深與滾水壩脊相平空船足數浮送卽應堵閉泗河會合諸泉收入獨山湖僅濟南運應請於兗州府

金口壩截築土偃俾達馬場湖俾濟寧上下河道並資其益蜀山馬蹏二湖專濟北運亦須築壩收蓄又請增募夫役挑濬沙趙漳衛汶泗韓馬諸水均報聞又奏黃河北岸耿家寨埽工爲豫東第一險要自乾隆九年下埽修防歲費帑料去冬於對岸引渠冀分溜勢今秋全河暢分入渠險工淤閉得旨嘉獎三十年調江南河道總督上以宏初自監司擢用道廳以下多同官慮有瞻徇命高晉統理南河留宏協理河東總河奏言黃河至河南武陟榮澤始有隄防丹沁二水自武陟木欒店匯入伊洛瀛澗四水自鞏縣洛口匯入設諸水並漲兩岸節節均須防守臣咨飭陝州於黃河出口處鞏縣於伊洛瀛澗入河處黃沁同知於沁水入河處各立水誌自桃汛迄霜降長落尺寸逐日登記具報如遇陡漲飛報江南總河嚴督修防大丹河至河內縣丹谷口舊築攔河石壩令由小丹河歸衛濟運請不時察驗疏令暢達衛河輝縣百泉爲衛河之源蘇門山下匯爲巨浸南建三斗門中爲官渠濟運東西爲民渠灌田向例重運抵臨清閉民渠使泉流盡入官渠五月後插秧一日濟運一日灌田惟民渠石壩失修泉

水旁洩應令修砌堅實均如議行上以清口節宣未暢下河田廬易涸特定高堰五壩水誌水高一尺清口壩拆展十丈三十一一年三月宏奏言清口水門因上年霜降後湖水大消祇留十四丈桃汛將屆應預將東壩拆展使口門寬二十丈俾洪湖及早騰空預留容納之地上嘉之夏秋間湖水盛漲續展至五十丈八月河溢徐州韓家堂宏與高晉分駐兩壩堵築逾月工竟奏言平時大展清口騰空湖面乃得葺工迅速冬以湖水漸落請接築東西壩仍留口門二十丈酌量收束蓄清抵黃三十三年河溢王家田頭下吏議降調寬之三十四年奏言洪澤湖水大將清口東西壩遞展宜洩適黃水隸長灌入清口隨閉惠濟通濟福興三閘俾併力敵黃黃水消退報聞三十六年卒宏嘗以明汶上老人白英立祠戴村子孫向有廢襲請旨仍給八品世職上從之李奉翰宏子入資授縣丞補沂水累遷江蘇蘇松太道坐事罷復入資還原官發江南河工効力奏署河庫道上以奉翰宏子習河事命真除四十四年署江南河道總督四十五年二月授河東河道總督河溢考城芝蔴莊張家油房奉翰督吏塞芝蔴

莊工竟上諭曰勉爲之莫以水弱而弛其敬謹旋命仍署江南河道總督奉翰
奏張家油房工未竟較南河隄算工爲要請留河東俾歲其役報可九月張家
油房工亦竟上爲欣慰四十六年正月調江南河道總督二月奏請重定南河
汛員額闕酌增河兵移改運河開官運河汛員視缺簡要更定品秩下大學士
九卿議行七月河決青龍岡命偕大學士阿桂馳赴河南會河東河道總督韓
錢督辦東西兩壩下埽甫合龍壩墊陷乃與阿桂等議寬濬青龍岡迤下至孔
家莊榮華寺楊家堂諸地引河並於黃河下游北岸疏潘家屯張家莊二引河
蘇家山水綫河宿遷十字河桃源顧家莊引河五道洩水四十八年春青龍岡
工竟方壩陷奉翰督吏搶護墮入金門格於纜傷焉河工謂兩壩間爲金門纜
所以引埽者事聞上四十九年上南巡奉翰親行在上獎其勤勞賜騎都尉世
職五十年坐清口東西兩壩不早收束致運道淺阻降三品頂帶尋命復之秋
河水大至奉翰督吏晝夜填築塞李家莊煙墩頭司家莊湯家莊諸漫口五十
四年調河東河道總督五十八年命赴浙江會巡撫吉慶會勘海塘奏請以范

公塘及海甯石塘改築柴盤頭並於石塘前修補坦水三官塘柴工後加培土
餉從之五十九年漳水溢臨漳三臺漲發命馳往勘察奏漳河兩岸沙土浮鬆
水勢驟長驟落向無隄堰上年大雨漫溢應將下游淤墊處疏濬深通再將三
臺壩基填築俾歸故道上從其議嘉慶二年正月加太子太保授兩江總督兼
領南河事三年河決睢寧四年正月與河道總督康基田督塞睢州決口工竟
二月卒李亨特奉翰次子入資授布政司理問發河東委用補兗州通判累遷
雲南迤西道嘉慶初佐平苗猺賜孔雀翎加按察使銜累遷調授江蘇按察使
九年擢河東河道總督十一年河南巡撫馬慧裕劾亨特索屬吏賂不得迫令
告養諸狀上命侍郎托津等往按奪官發伊犁十三年釋還令至南河候差委
十四年以河決荷花塘追咎亨特不善料理復發熱河効力未幾復釋還授主
事十五年選戶部主事擢直隸永定河道未幾復授河東河道總督十六年奏
南糧到通州剝運不能迅速請在楊村全數起剝下倉場侍郎玉甯戴均元等
議駁上責亨特冒昧下吏議降調命留任十八年秋河溢睢甯坐奪官命留工

効力十九年河道總督吳璥奏微山湖存水僅一二尺南陽昭陽獨山諸湖淤成平陸無水可導上責亨特在官不能預籌又聞亨特既奪官居濟甯仍用總河儀制斥亨特玩誤縱恣命逮下刑部治罪籍其家刑部議發新疆上命在部荷校半年發黑龍江効力二十年卒於戍所

何焯字謙之浙江山陰人先世籍湖南靖州雍正中入資授州同効力江南河工從大學士河道總督嵇曾筠修浙江尖山海塘請補杭州東塘同知避本籍仍發江南河工乾隆初權豐碭通判授桃源同知十五年擢河庫道十六年遷兩淮鹽運使特敕兼管河務以母憂去官十九年尙書劉統勳等奏論河庫帑項不清奪焯官擬徒追償拘留工次久乃繳完免罪二十二年仍發南河以同知用從侍郎夢麟疏溶荆山橋河工從副總河嵇璜治淮揚河務超擢淮揚道二十三年丁父憂總督尹繼善奏留在任守制許之二十六年以郎中內調會河決中牟楊橋上命大學士劉統勳等莅工以焯從工竟留焯駐工防護旋授開歸陳許道調山東運河道三十年調河南河北道擢按察使上以焯習河事

命兼領河工烟信浮屠說讞獄輒從輕比睢州民劉玉樹謀殺人鞠實擬斬候刑部改立決上責烟寬縱諸巡撫阿思哈阿思哈稱其能勝任其冬擢布政使仍兼理河務兩權巡撫三十六年授巡撫兼河務如故尋又命兼領山東河道三十七年浙川內鄉被水正陽確山風災疏請撫卹緩徵上賜詩褒以愛民知政三十八年上巡天津閱永定河工烟迎駕賜孔雀翎黃馬褂尋命與工部尚書裘曰修直隸總督周元理勘永定河上游疏言永定河挾沙而行散漫無定水性就下本無不同而地有高卑沙有通塞情因時而或異永定河遷徙不定其情也非其性也察其情導其性先宣後防千古極則雖起神禹無以易之永定河下口蒙皇上指示疏導既不阻下達之勢更免浸潤之虞其法固當常守所慮數十年後妄生異論別騁新奇勢且變亂舊章貽河防巨患請將聖諭并議言條欵勒碑垂久遠報聞三十九年疏請各州縣常平倉溢額以四千石爲限餘循例變價又奏河南漕穀七十九萬薊米二十九萬分存各州縣界鄰省安陽等五州縣限二萬石近水次祥符等三十五州縣限一萬石均如所擬

加總督銜仍領河南巡撫又進兵部尚書銜其秋會勦王倫事平道內黃病作
遣醫往視未至卒燭贈太子太保祀賢良祠賜祭葬諡恭惠裕城燭子字福天
自貢生入資授道員乾隆四十二年除山東督糧道調河南河北道河溢儀封
大學士高晉莅工以裕城從儀封婦工墊陷坐奪官命留任四十六年調江南
河庫道裕城待燭治河管著全河指要謂治河當節宣並用不當泥河不兩行
之說偏於節束並上書當事指陳南北岸諸險工未幾河決青龍岡注徽山湖
衝運河四十七年七月河東河道總督韓錢丁憂青龍岡工未竟上特命裕城
署理大學士阿桂視工曲家樓請自蘭陽至商邱別築新隄裕城奏蘭陽新開
引河其上游素稱險要必須內有重障外有挑護大隄後舊有越隄相去遠恐
不足恃請向東添築格隄臨河近溜處加築挑水壩上從之又奏兗州伊家河
在運河八閘之西以分洩運河及瀕湖諸水應挑展寬深上命速興工又奏伊
家河興工後卽往河南勘驗引水子溝仍往來山東河南督察上嘉之並諭曰
汝若能不自滿而加以勤學或可繼汝父也伊家河工竟四十八年賜孔雀翎

四十八年青龍岡工竟請修築運河隄岸詣濟甯勘估奏需帑六十四萬有奇得旨允行授河南巡撫以秋審多失出降三品頂帶停支養廉四十九年運河隄岸工竟命議叙師討石峯堡亂回道河南裕城佐軍興復頂帶養廉五十年調陝西巡撫朝邑被水上諭裕城就被水處將淤積泥沙建築河隄尋奏勅建護城隄下部議行調江西巡撫五十二年奏江西河路二千四百餘里請以所獲盜舟改設巡船上嘉之又奏豐城鎮平隄中段水勢衝激不足捍禦請改建石隄從之五十五年調安徽巡撫命來京祝八旬萬壽行次合肥卒

吳嗣爵字樹屏浙江錢塘人八歲而孤母錢督之嚴雍正八年成進士授禮部主事大學士張廷玉奏改吏部再遷郎中嗣爵彊識嫻故事乾隆六年授常州知府再授保寧皆奏留部旋命視學湖北調福建十三年授淮安知府遷淮揚道洪澤湖盛漲例當開天然壩嗣爵曰開壩減暴漲如下河州縣生靈何持之力卒無恙十六年調兩淮鹽運使十八年復授淮陽道遭母憂上諭曰防河官吏叢弊故特山運使調用河工與地方官吏不同畀假兩月治喪畢在任守制

擢江蘇按察使遷布政使調湖南未行奏江甯等三十五州縣積欠應徵口糧請特旨緩徵上諭巡撫託恩多託恩多奏江甯等州縣年豐不當再請緩徵上責嗣爵藉緩徵卸過並爲有司催徵不力地命發江南河工以同知用二十五年補宿虹同知仍授淮陽道移准徐道黃河盛漲逼徐家莊縷隄嗣爵督吏搶護命署理河東河道總督旋坐官運使時商人侵蝕提引公費坐降調命改奪官仍留任三十四年奏請修補丁廟六口南旺荆門戴村諸閘壩並言運河兩岸土工臨清以北爲民堰南旺以南爲官隄自臨清至南旺官隄民堰交錯請凡民堰卑瀝殘缺處督令修築官隄酌緩急次第培修上嘉之署河南巡撫三十五年奏南旺湖北高南下在運河西岸值分水口之衝伏秋汶水發自關家常鳴等斗門灌入祇能收水入湖不能出水濟運請於南旺下游土地廟前增建石閘一以時啓閉三十六年遷江南河道總督四十年奏丁家集黃河自北趨南北岸新灘插入河心致沖漫南岸民堰五百餘丈毛城鋪過水較大下流亦不能容今收正河頭測量河唇滲引渠築子壩於北岸旁黃河故道滲引河

來春相機開放俾河改由北岸東下不使旁注丁家集諸地又奏裏河廳運口本設惠濟通濟福興三閘惠濟尤爲淮水入運關鍵請俟春融修築四十一年又奏清口通湖引河凡五爲洪澤湖尾閘並分別籌措運道以濟尋奏五引河中張家莊裴家場二河水洩應濬使寬深從之四十一年上東巡嗣爵覲行在入對不能興左右掖以出改吏部侍郎四十二年乞罷歸四十四年卒年七十有三子璲自有傳

薩載伊爾根覺羅氏滿洲正黃旗人父薩哈岱官鑲藍旗滿洲副都統薩載繙譯舉人授理藩院筆帖式累遷江蘇蘇松太道管蘇州織造果親王弘曆短價令製絀緞朝衣事發奪官召還京予主事銜尋授薩哈岱蘇州織造命薩載侍行爲佐逾年改授普福命交兩江總督差委旋授松江知府三十年加道銜復署蘇州織造三十四年擢江蘇布政使仍兼織造三十五年署巡撫巡撫永德請以華亭寶山土塘改建條石薩載言條石易傾圮按察使吳壇請裁巡檢弓兵增州縣捕役薩載言不便皆寢其議三十六年與總督高晉奏浚海州河道

又奏江蘇社穀積至三十七萬六千餘石請察驗報聞三十七年眞除江蘇巡撫上命察屯田薩載奏江安糧道屬江淮興武等六衛蘇州糧道屬蘇州太倉等四衛令清釐冊報循新例四年一編審加給江淮興武二衛屯丁墾田運丁快丁終歲輓輸請加給津貼太倉鎮海二衛田不隨船私相售典循舊例借項贖回從之三十九年河溢外河廳老壩口借河道總督吳嗣爵董工事未兩旬工竟議叙四十一年上東巡親行在授江南河道總督命與高晉察黃河海口淤沙薩載先至奏海口前在王家港自雍正時接湧淤灘長四十餘里南岸爲新淤尖爲尖頭洋北岸爲二泓三泓四泓二泓四泓寬二十餘丈潮至深二三丈三泓寬四十餘丈潮至深三四丈河底有高低河唇又漸遠淤積已久難以施工上諭曰此海口自然之勢難以人力勝之尋與高晉奏請以清口東西壩移建平城臺於陶莊迤上別開引河是夏運河及駱馬湖水漲薩載督吏防護上嘉其妥協尋開陶莊引河四十二年二月工竟上諭曰朕屢次南巡臨閱清黃交匯處慮其倒灌思引向陶莊北流歷任河臣未有能任此者昨歲薩載奏

請施工與朕意合據奏工竟自此黃河離清口較遠既免黃河倒灌之虞並收
清水刷沙之益實爲全河一大關鍵視齊蘇勅例子騎都尉世職又覲上命於
攔黃壩迤上加築壩爲重門保障並於舊有木龍三架迤上增設木龍薩載回
任奏遵上指料理上嘉之冬復奏新河河面首尾寬窄不同請於北灘順水勢
抽槽酌留土格俟來年水漲放溜衝刷使河面首尾寬闊相若繪圖以進上覽
圖中北岸有新淤因慮北淤則溜必南趨識以朱筆命薩載疏治四十三年奏
高家馬頭新淤已刷動寬深彭家馬頭新淤前作柴枕土壩茲於灘面抽槽候
水漲衝刷旋署兩江總督四十四年奏欄黃壩外舊河露淤灘請於灘面築束
水隄爲新河保障尋實授兩江總督先是高晉奏中河口門淤阻議移下游李
家莊上命薩載勘奏薩載請將清口東西壩移築惠濟祠前上從之四十五年
大學士阿桂奏陶莊引河首尾寬而中窄河身雖已刷深水勢尙嫌束縛伏秋
汛漲恐宣洩不及命借薩載勘覆尋奏請河寬六十餘丈處展十餘丈河寬不
及六十丈處展二十餘丈又奏雲梯關外二套以下河流現行之道道遠而水

淺請於四泓以下增設閘壩二套上進西馬港河舊隄殘缺應行修復並於舊無隄處補築新隄下接北潮河西堰上從之夏河溢郭家渡命薩載與河道總督陳輝祖督護是歲河水盛漲初開毛城鋪蘇家山峯山頭諸閘次將清口東西壩全行拆展薩載奏諸州縣被水惟甯泗州爲重邳州宿遷靈壁五河次之見在撫恤窘貼上諭曰實在無善策祇可盡力撫恤以期補過復命引河水入陶莊新河尋奏豐碭銅沛險工俱次第搶護下游洪澤高寶諸湖亦俱平定俟水落堵築得旨覽奏深慰先是上臨高堰閱洪澤湖甄石諸工諭薩載石工卑者增高甄工悉改用石薩載奏請酌量緩急分三年修築八月丁父憂命百日滿後仍署兩江總督四十六年奏請自李家莊至臨河築北濬引河上命速爲之六月河溢魏家莊水大至薩載奏全河奔注歸入洪澤湖清口展寬至八十丈山圩五壩已開智義二壩而高堰諸地水勢未消盈隄推岸未開三壩及車邏昭關二壩或堅守或酌開俟察勘後續奏上命堅守尋續奏洪澤湖浪湧山圩五壩所存仁禮二壩掣通過水續開車邏昭關二壩上以各閘壩俱開下河

民田被淹令察災狀速奏八月魏家莊工竟山東巡撫國泰奏運河積淤水不能暢行議於劉老澗壩旁開水口分洩上命薩載往勘薩載奏運河洩水宜暢已開駝車頭竹篋壩洩水入駱馬湖劉老澗九孔石閘亦過水若議別開水口不便使無水之區再受水患上韙其言又奏微山湖東南兩面水色澄清沂河及駱馬湖水不使涓滴入運爲運河騰空去路永濟橋孔亦無橫壩攔截水勢暢消上稱爲有條理命國泰聽其指授母持己見十二月兼署安徽巡撫四十七年奏請濬泗州謝家溝洩睢河及楊疇諸河水入洪澤湖又承上命濬銅山潘家屯引河四月河南青龍岡漫口旣堵復蝨大溜下注上命寬濬潘家屯劉老澗諸河洩水歸海薩載請開張家莊引河與潘家屯引河分流使湖洩入黃又多一路上諭曰籌洩水之路爲今日急務宜妥爲之加太子少保江蘇巡撫吳壇議開金壇漕河自丹徒穿句容境分水脊達江甯薩載奏分水脊卽茅山之麓地峻土堅勢不能開鑿請濬七里橋至巷口橋河道與上下河道寬深一律又請自鎮江錢家港至江甯龍潭濬開新河及修濬金山對渡瓜洲城河上

嘉之又奏請濬漣河展駱馬湖六塘河鹽河口門均如議行四十八年正月服
闋實授兩江總督河南青龍岡工竟薩載奏黃河歸故道入江南境流行迅速
得旨欣慰覽之上命移建沛縣城薩載奏請移舊城西南戚山並修夏鎮文武
官署豐沛二縣漕倉四十九年江西巡撫郝碩坐婪賄得罪責薩載未奏劾下
吏議奪官命留任罰養廉三年五十年漕艘北行以運中河淺阻至天津誤期
上責薩載開運中河不知建閘水勢一洩無餘又清口東西壩不能及早收束
預爲蓄水致運道淺阻降三品頂帶五十一年足疾請解任遣醫往視命復原
品尋卒贈太子太保賜祭葬諡誠恪祀賢良祠子薩騰安襲騎都尉官至廣西
按察使薩雲安官雲南迤西道坐事戍軍臺蘭第錫山西吉州人乾隆十五年
舉人授鳳臺教諭擢順天大興知縣三十四年總督楊廷璋請以第錫升補永
定河北岸同知吏部以大興非沿河州縣議駁再請上特許之再遷永定河道
四十八年署河東河道總督奏請河隄分界栽柳並禁近隄取土又奏儀封六
堡三堡灘面淺狹水力較悍請於新隄南築月隄爲障皆從之四十九年奏河

工綱繆防護全在平時隄有深淺水有變遷及車馬踐踏貓鼠洞穴必朝夕在隄始能目視親切至冬末凌汛春初桃汛尤應晝夜巡邏應令駐工各員移至隄頂禁勿私下如有曠誤文武得互舉令以隄爲家庶不至疏防均如所請行五十年奏北岸黃沁等廳南岸上南等廳舊隄及蘭儀等廳新隄各增卑培濬并加築舊壩添作挑水上命速行五十二年上以第錫署任三年勤奮妥協命實授旋兼兵部侍郎河溢睢州十三堡疏請罪上以其地原無埽工原之工竟議叙五十四年調江南河道總督河溢睢甯周家樓疎請罪上以河水異漲原之工竟議叙五十六年奏勘毛城鋪滾水壩王平莊新挑引河上獎第錫察驗各工不草率五十七年請自淮安移駐清江浦改建衙署允之五十九年奏豐北汛接築土壩過多上游水勢不能暢達有礙曹單河流去路自請下吏議奪官上命留任嘉慶元年河溢豐北汛疏請罪諭俟工竣覈功過工竟賜黃綬荷包仍以不能先事預防停甄叙二年卒三年第錫以河溢當償帑二十萬餘兩上以第錫尙廉潔慮不能勝諮山西巡撫伯麟伯麟奏第錫遺田舍僅值一百

四十餘兩上獎第錫清慎諭道廳以上及曾任總河各員分別代償

韓鏞順天大興人原籍貴州畢節入資授通判揀發山東授上河通判累擢江南淮徐道四十六年授河東河道總督奏言山東運河賴汶泗來源及各湖接濟汶河上游東平戴村等處民堰對岸沙淤應鑿灘抽溝以展河勢泗河下游卽爲府河自安居十里二斗門入運河淺堰卑亦當疏治蜀山馬蹶馬場南旺諸湖現當濟運洩水堰根顯露正可取土培堤七月河決祥符焦橋疏請罪上原之工竟命優叙未幾河又決儀封曲家樓青龍岡大李家莊孔家莊凡溢四口上令江南河道總督李奉翰赴工會督水全出青龍岡而孔家莊等三口皆塞又命大學士阿桂履勘又令山東巡撫國泰赴工會督工垂竟壩墊復潰大學士嵇璜議引河北流復故道上以賂阿桂李奉翰及鏞鏞疏言青龍岡始漫勢甚洶湧是以倒漾北行分入沙趙二河穿運歸海未久旋即斷流仍行南注地勢北高南下若於南岸建堤堵截欲迴狂瀾使之北注誠如聖諭必不能行水性就下未便輕議更張阿桂等所奏亦略同乃寢璜議惟以河水北行既已

斷流責鏐何不卽時具奏四十七年正月塲復墊上聞運道河以南深通河以
北多淤墊命鏐往徵山湖北運河察勘二月赴濟甯會國泰及巡漕御史毓奇
察勘請自濟甯在城崗至嶧縣黃林莊築土堰柴塲椿橋梁設水站置絞關
鏐並請察勘畢還青龍岡工次上命鏐往來督察復勘伊家河荆山橋諸地水
勢請濬銅山潘家屯引河益使寬深並濬駱馬湖六塘河及濟甯南北徒駭馬
頰伊家等河時青龍岡塲屢築屢墊鏐遵上指述籌宣洩使黃水漸消復還青
龍岡工次會阿桂等於蘭陽三堡改築大隄濬渠導水出商邱七堡入正河故
道鏐旋以父憂去四十八年三月青龍岡工始竟四十九年服闋授工部侍郎
部議鏐任河督時應償帑十四萬餘兩詔免十之七五十四年命會勘通惠溫
榆二河及朝陽門外護城河調戶部五十五年命往江南會同江南河道總督
蘭第錫督防汛嘉慶三年調兵部四年三月命守護裕陵六年以年老休致九
年卒

論曰世業尙矣於河事尤可徵前乎此者嵇曾筠有子璜高斌有從子高晉若

李氏何氏吳氏皆繼之而起宏及子奉翰焯及子裕城並有名乾隆朝嗣爵子
瞻則下逮嘉慶奉翰子亨特貪侈隕績忝祖父矣清時以誠篤名第錫以廉潔
著青龍岡塞河決歷兩載工始竟阿桂主之薩載韓傑佐之詳具其始末見成
功之難也

清史稿

列傳一百十三

開泰

阿爾泰

桂林

溫福

開泰烏雅氏滿洲正黃旗人雍正二年進士改庶吉士授編修九年遷侍講上御門開泰未入侍班黜令乾清門行走十三年復編修乾隆元年遷國子監司業八年遷祭酒督江蘇學政再遷內閣學士三遷兵部侍郎仍留學政任十年授湖北巡撫疏言社會較常平尤近於民而弊亦易滋湖北社倉穀麥五十二萬石有奇散在諸鄉恐多虧缺應飭道府按部所至便宜抽驗調江西十三年又調湖南疏言戶部咨各省常平倉穀以雍正舊額爲準湖南溢額穀五十五萬餘石令糶價儲庫臣維雍正舊額七十餘萬石湖南夙稱產米乾隆二年至八年諸省赴湖南購米先後計百七十五萬有奇中間又撥運福建江蘇若盡糶溢額之穀遇本省需用或鄰疆告糶必致倉儲缺額買補不易疏上以留心積貯嘉之十五年有壽掄元者自言南河同知赴湖南採木布政使孫灝諭永

州府爲料理尋得其詐僞狀開泰以聞但言瀕殊爲未諳上以瀕際徇何得但言未諳知爲開泰門生斥其徇庇下吏部嚴議議奪官命留任尋調貴州十八年疏言古州募軍屯田戶上田六畝中田八畝下田十畝今食言日多生計艱難請准屯戶入伍充兵許之撫湖廣總督加太子少傅二十年調四川金川土司沙羅奔與革布什咱土司色楞敦多布初爲婚媾繼乃相怨搆兵旁近縉斯甲布鄂克什雜谷巴旺丹壩明正章谷小金川諸土司皆不直沙羅奔二十三年沙羅奔攻吉地吉地色楞敦多布所居寨也開泰與提督岳鍾琪檄游擊楊青都司夏尙德等率兵分屯章谷泰甯令鄂克什雜谷援革布什咱攻金川沙羅奔引退尋復攻破吉地色楞敦多布走泰甯求援開泰復檄諸土司出兵助之調雜谷土練千人分屯丹壩章谷泰甯發黎雅峨邊兵屯打箭爐諭耶卡撤兵耶卡沙羅奔從子爲副酋主兵事也事聞上謂番目相攻於打箭爐何與疑耶卡擾邊命開泰具實覆奏開泰尋疏報章谷巴旺土兵擊敗金川沙羅奔焚吉地走盡復命革布什咱境留縉斯甲布明正兩土司兵分守之使色楞敦

多布歸察上諭曰番民挾仇攻擊不必繩以內地官法宜以番攻番處以靜鎮旋加太子太保二十四年松潘鎮總兵楊朝棟入覲開泰與鍾琪奏朝棟衰老難期勝任上責開泰何以不先奏下吏部議奪官命仍留任二十七年莎羅奔死耶卡應襲例土司承襲鄰封諸土司具結開泰以耶卡與諸土司皆不協令毋取結疏聞上許之命嚴諭耶卡知恩守法未幾耶卡侵丹壩取所屬瑪讓開泰檄綽斯甲布往援使守備溫欽等赴金川詰責上諭曰耶卡狼子野心卽使詰責伏罪豈肯永守約束諸土司援兵既集能協力剿除分據其地轉可相安若諸部不能并力勦除而耶卡怙惡不悛亦非開泰岳鍾琪四川綠營兵能任其事應臨時奏請進止二十八年六月開泰奏九土司大舉擊破金川上聞耶卡使人詣成都開泰許進謁撫慰之而陰令九土司進兵諭曰耶卡於綽斯甲布等屢肆欺凌衆土司合力報復開泰既聞其事惟應明白宣示諭令悉銳往攻而於耶卡來人嚴爲拒絕且諭以爾結怨鄰境誰肯甘心斷不能曲爲庇護如此則耶卡既不敢逞強綽斯甲布等亦可洩忿乃既用謠以籠絡耶卡又隱

爲各土司授助耶卡素狡黠豈能掩其耳目殊非駕馭邊夷之道命奪官以頭等侍衛赴伊犁辦事尋卒

阿爾泰伊爾根覺羅氏滿洲正黃旗人雍正間以副榜貢生授宗人府筆帖式
乾隆中屢遷至山東巡撫以山東產山綳疏請令民間就山坡隙地廣植梓櫟
免其升科歲大水阿爾泰先後濬兗州沂州支渠三十有九曹州單縣順隄河
二百餘里培南旺蜀山湖民埵導章邱珍珠麻塘二泉新城五龍河溉民田並
及高苑博興惠民諸縣近水地皆令栽稻築沈河隄至於馬場湖以衛濟寧州
城析白馬湖引入獨山湖以疏泗水開汶上稻田數百頃濟東諸州縣瀕徒駭
馬頰兩河支流相貫注及哨馬營四女寺支河皆次第疏治濬衛河自德州至
於館陶凡三百餘里洩壽張積水自沙趙二河入運洩東平積水入會泉大清
諸河洩濟南東昌諸州縣積水開支河三十餘循官道爲濠引水自濠入支河
自支河入徒駭大清諸河漳汶合流開引河埵子埵以防盛漲阿爾泰撫山東
七年治水利有績擢四川總督加太子太保阿爾泰至四川議平治道路陸道

北訖廣元西達松潘東抵夔州護其傾破補其缺落兼葺大渡河澗定橋水道
自萬縣入湖廣境整治險灘凡一百有奇議以牧廠餘地招佃爲田議置義倉
捐穀千餘石以倡議開南川金佛山礦議築都江大堰議松潘雜谷打箭爐
三廳置倉儲麥稞備邊儲上皆從其請初征金川以頭人郎卡出降罷兵三十
一年復爲亂掠丹壩巴旺阿爾泰策以番攻番令旁近綽斯甲布諸土司攻之
秋出行邊至雜谷腦耶卡使請還所侵丹壩碉卡復與提督董天弼進至康巴
達耶卡出謁阿爾泰許如所請並畀以新印疏聞上戒毋遷就苟安三十五年
小金川頭人僧格桑掠鄂克什阿爾泰赴達木巴宗僧格桑出謁還侵地尋授
武英殿大學士仍領總督三十六年召還京入閣治事既復令出領總督金川
頭人索諾木改革布什咱僧格桑亦圍達木巴宗侵明正土司阿爾泰疏言兩
金川相比如議出師需兵旣多糜餉亦鉅茲令董天弼臨之以兵仍使游擊宋
元俊宣諭索諾木上責阿爾泰議非是決策用兵令定邊右副將軍溫福視師
佐以侍郎桂林諭斥阿爾泰掩飾偷安奪大學士總督留軍治饑以桂林代爲

總督師克約咱上以阿爾泰鑄大礮利軍行予散秩大臣銜三十七年與總兵宋元俊劾桂林覆軍諱敗上爲罷桂林卽命阿爾泰攝總督俄移督湖廣阿爾泰疏言各路轉餉當招商承運西路去內地近南路山險途長商不肯應募當增運值火藥已運罄當令雲南陝西協助上謂阿爾泰專領轉餉何不早籌畫今福隆安阿桂皆至南路始以一奏塞責命毋往湖廣仍以散秩大臣留軍督餉未幾阿桂疏言軍至卡了無五日之糧又言綽斯甲布轉餉將一月猶未至阿爾泰亦自陳請奪職從軍上責其倚老負恩始終不肯以國事爲念命逮問阿爾泰初至四川上以天壇立燈竿下四川求楠木阿爾泰附運木材以進言出養廉採獻旣乃私語人謂他日且以此負累語聞上上心慊之至是詔罪狀阿爾泰猶及此事斥爲昧良飾詐川東道托隆入見發阿爾泰賊私下繼任總督富勒渾嚴鞫三十八年獄具擬斬上命賜自盡

桂林伊爾根覺羅氏滿洲鑲藍旗人兩廣總督鶴年子桂林自廩生入貲爲工部主事累遷山西按察使三十六年三月擢戶部侍郎軍機處行走九月命佐

定邊右副將軍溫福討金川十一月授四川總督小金川頭人在卡外投文魄
土宜桂林卻不受檄罪狀其曾僧格桑旋督兵收約咱進克其東山梁大小碉
五石卡二十餘疏請添調黔陝兵五千益師上許益陝廿兵三千桂林旋督總
兵宋元俊攻卡了進據墨爾多山梁上嘉其措置合宜手詔謂無意中用汝竟
能得力亦賴在軍機處半年日聆朕訓也三十七年克卡了復破克郭松甲木
噶爾金進克噶爾金後山梁分兵攻東山梁襲阿仰自墨壑溝進取達烏圍是
時大金川曾索諾木攻陷革布什咱屯兵其地桂林議乘索諾木兵力未備革
布什咱人心未定與元俊分兵五道並進并約將軍溫福合擊密令革布什咱
降曾旺勒丹等約其戚加琿爾爲內應遂收革布什咱寨落七十餘里旋令元
俊及守備陳定國率綽斯甲木土兵屯甲爾壑壩進攻默資溝吉地斷其水道
進攻丹東上獎桂林甚合機宜促元俊乘勝深入取索諾木桂林遣裨將自東
山梁墨壑溝越嶺進攻別遣兵出間道自札哇窠山梁縋崖設伏師旣度東山
梁墨壑溝札哇窠伏兵亦起賊敗竄克大碉一石卡二十一別遣參將常泰環

攻黨哩都司李天貴等攻沙衝革布什咱頭人爲內應賊盡殲黨哩沙衝地並復總兵英泰等復攻克達烏官寨上嘉其功賜御用玉韉再進攻克格烏巴桑及那隆山嶺元俊別攻克丹東及覺拉喇嘛寺誅賊渠三百番衆百三十餘革布什咱地盡復桂林檄定國將所調納斯甲布兵駐界上聽調上以革布什咱既復正當乘勝進勦金川攻其無備責桂林失算桂林復督兵攻達烏東岸山梁參將薛琮戰沒琮驍將深入糧盡桂林既失期不會師又不以時遣援軍盡覆疏請治罪述戰狀不敢盡元俊與散秩大臣阿爾泰刻其虛誑並言桂林在卡了建屋宇以居迫屬僚供應與副都統鐵保提督汪騰龍等終日酣飲諸將罕得見密令騰龍昇總兵王萬邦白金五百贖被掠官兵希圖掩飾上奪桂林職命額駙尙書公福隆安馳往按治尋奏所劾皆虛惟官兵傷損不卽察奏屬實至贖被掠官兵乃在軍戶部郎中汪承霈聞巴旺布拉克底土兵歸失道官兵告桂林發白金五百交騰龍備實事爲元俊構陷請分別治罪上以桂林在軍日親糲槩止圖安逸不能與士卒同甘苦致北山梁傷損多兵不得爲無罪

命戍伊犁三十八年七月予三等侍衛銜仍詣軍前督糧運四十年授頭等侍衛尋授四川提督遷兩廣總督卒加太子太保銜諡莊敏

溫福字履綬費莫氏滿洲鎮紅旗人文華殿大學士溫達孫也自繙繹舉人授兵部筆帖式乾隆初累遷戶部郎中外擢湖南布政使歷四年移貴州布政使亦四年坐平遠民間訟庭按治草率奪職戍烏里雅蘇臺二十三年起內閣侍讀學士從定邊將軍兆惠討霍集占戰葉爾羌鎗傷額擢內閣學士遷倉場侍郎子雲騎尉世職外授福建巡撫內遷吏部侍郎軍機處行走進理藩院尙書三十六年師征金川授定邊右副將軍以侍郎桂林佐之共討賊溫福自汝川出西路桂林自打箭爐出南路時小金川頭人澤旺子僧格桑割地乞援於大金川頭人索諾木索諾木遣兵助之上命先勦小金川且勿聲大金川罪溫福至打箭爐分兵三道入溫福出巴朗拉提督董天弼自甲金達援達木巴宗總督阿爾泰白約咱攻僧格桑十一月擢武英殿大學士十二月至巴朗拉戰三晝夜賊敗去三十七年正月取達木巴宗進攻斯庫葉安而分軍出別斯滿

瑪爾瓦爾濟兩路夾擊進克賚哩再進克東瑪再進克路頂宗及喀木色爾取
諸碉寨再進得博爾根山梁並攻克得瑪覺烏寨落攻公雅山十二月授定邊
將軍以阿桂豐昇額副之進克明郭宗再進克底木達底木達者僧格桑父澤
旺所居寨也師至俘澤旺檻致京師誅於市而僧格桑奔大金川溫福檄索諾
木令縛獻僧格桑不應上將進討大金川溫福等疏言前此張廣泗征金川十
路七路分合不常實祇有六路皆以抵勒烏圍噶爾依爲主一爲卡撒正路自
美諾至噶爾依約五程爲傳恒進兵路一爲丹壩自維州橋紅番地抵勒烏圍
約二十餘程中有穆津岡天險爲岳鍾琪進兵路一地名僧格桑自美諾抵噶
爾依六七程卽總兵馬良柱所行路一爲革布什咱一爲馬爾邦皆距噶爾依
六七程險狹難行一爲絳斯甲寨至勒烏圍三程至噶爾依亦三程均隔大河
碉寨林立難攻此外又有俄坡一路從絳斯甲寨至勒烏圍僅二程路較平今
當由卡撒正路進兵其俄坡一路既有絳斯甲土司願出兵復其侵地可爲特
角其餘各路分兵牽制使不能兼顧於是溫福自功噶爾拉入阿桂自當噶爾

拉入豐昇額自縊斯甲布入溫福性剛復不廣咨方略惟襲訥親張廣泗故事以碉卡攻碉卡修築千計所將兵二萬餘強半散在各碉卡每逾數日當奏事卽督兵攻碉士卒多傷亡咨怨無鬪志溫福日置酒高會參贊伍岱款曰焉有爲帥若此而能制勝者因密疏聞上溫福亦疏劾伍岱上命豐昇額及額駙色布騰巴勒珠爾按治溫福又言色布騰巴勒珠爾朋比傾陷上爲奪伍岱職令色布騰巴勒珠爾速詣熱河行在獄成戍伍岱伊犁三十八年春溫福師至功噶爾拉賊阻險不得進別取道攻黃嶺駐軍木果木令提督董天弼分軍屯底木達木果木底木達皆故小金川地索諾木陰使小金川頭人煽諸降番使復叛諸降番以師久頓不進遂蠱起應之先攻底木達天弼死之次劫糧壩潛襲木果木溫福不嚴備山後要隘賊突薄大營奪砲局斷汲道時大營兵尙萬餘運糧役數千爭避入大營溫福堅閉壘門不納糧而潰聲如墜堤於是軍心益震賊四面蹂入溫福中槍死各卡兵望風潰散參贊海蘭察聞警赴援殿餘兵自問道出小金川地盡陷上初聞溫福死詔予一等伯爵世襲罔替祀昭忠祠

清 史 稿
卷 之 一
既劉秉恬海蘭察高勒冰各疏言溫福債事狀命奪伯爵子三等輕車都尉世職四十一年命併罷之子勒保永保皆有傳

論曰金川再亂開泰阿爾泰皆主以番攻番遲迴坐誤桂林有宋元俊不能用反饋乾之擁兵不進阿爾泰與元俊勅桂林此其意以軍國爲重不屑屑阿貴近疏卑遠宜若可成功乃坐蜚語敗溫福銳進似勝開泰擊乃又剛愎有董天弼不能用予兵至少令僻處軍後卒致債潰徒以身殉豈不惜哉